

Тури Рахманова

РАГЪУХЪАН



*Дагестанское
книжное издательство
Махачкала 2023*



В печать: С Г а с а н о в а

Дорогой читатель!

В твоих руках первый сборник рассказов для детей на агульском языке, написанный замечательной агулкой, талантливой поэтессой Гури Рахмановой.

Обратившись к детской прозе, автор наступила на благодатную и благодарную почву, обойденную, к сожалению, вниманием наших агульских поэтов и писателей.

Само название книги «Рагъухъан» («Радуга») обещает читателям необыкновенные встречи с интересными героями и увлекательные истории из их жизни.

От небольших рассказов веет особым ароматом трав наших высокогорных лугов, в них переплелись разноголосье родников, рек и ручьев, устремившихся с гор на равнину.

В своих рассказах автор стремится привить детям любовь к родному слову, к родному уголку, научить их быть чуткими, добрыми, внимательными, честными, трудолюбивыми. В них – волшебство, особый взгляд на мир и особое видение привычных вещей и занятий.

Рассказы знакомят маленького читателя с трудом хлебороба и чабана, с семейным укладом, с правами и обязанностями всех членов семьи, с нашей культурой, традициями и обычаями.

Родное слово, через образы «говорящих» и «рассуждающих» животных и птиц, звучит во всем богатстве агульского консонантизма и вокализма.

Заслуга автора и в том, что, являясь носителем керенского диалекта агульского языка, она вносит неоценимый вклад в развитие литературного агульского языка, обогащая его жемчужинами народного слова.

А чтение, как известно, развивает воображение, помогает ребенку представить мир по-своему, создать свои образы.

Остается только пожелать автору крепкого здоровья, новых творческих успехов.

С.Н. Гасанова,
доктор филологических наук,
профессор кафедры теоретической
и прикладной лингвистики ДГУ





ХІуппахъандин тулла

Авалдин вахттуни хІуппахъанарин кар ке иджеф хІисаб аркъафи. Гебур ке девлет хъае инсанар хІисаб аркъафи. ХІуппахъанарихъ чиппин иджи вардиш акъунае туллабура хъувефи. ХІучар гебури удуд акъуна, къил-къил акъуна фартафи. Гъагистти идехІела, хІучарис хІуппахъанарин туллабуригъас ппара ул гъай, гучІафи.

ХІуппарин убадаригІ садпуна гІачишафттавуи: хъуруцай, ккеркъвай, хъиркІенди эркъвайи гІачишастти хІуппаригІ.

Хубжи вахттари учихъ хъай вардиш акъуна ахъуная хІуппахъанди са идже тулла, Алпан агъаф. Ппара гІаш-

къар алди ухІуф хъуная эесси учин тулла.

Вахттар-гагъар ккет-твей, туллара Іуссе хъуная: я иджи аргвай андава мис, я иджи ун вей андава, я хІучарихъ ахъихъас агърукъай андава мивас. Гъал хІуппахъанди туллайис агъая:



– Гьал, зе зурба Алпан, вун хулаъ экъуна кканде, захъай убадарихъ вес хъастава вафас. Баркаллагъ, зе дустт, вас, ппара муфиІат, хайир, кеттархъуне зас вакес.

Пушмал хъуная тулла, амма, чара адава, эесси пугъилди акъуна кканди ая. Гьал Алпан хулахъ эркъва эессин хизанарихъай.

Ме тулла ппара Іакъулар киеф хъуная, эессин шини-ккварис ппара кканве Алпан. Ке ппара гІашкъар алдеф ме туллайил Мурадан, эессин гадаин. Дузди пучи, сифтта вахттари тулла ппара бизар вей хъуная хулахъ, уч суварий, чІирарий вардиш хъунаеф идехІела. Мурада гьал Алпан учихъ хъай бицІи-бицІи дурухІай вардиш акъуная.

Гъилар алатай туллайилас, ширин чІалара агъай, гъургъая ме кІиркІ:

– Алпан, час вун ппара кканеф э, зун вас тупп акъасра ягІар акъасе, хъин Іудара дарадира весе.

Шад хъуная Алпан, ягІар хъуная мис, уч ме кІиркІас кканди аеф. Дарадира ушуная мебур, туппара акъуная, нецІварихъдира ушуная.

Гъамиштти алттушуная куче рагъарин гІул, адиная къизилдин цул, ругъу шавгъара фай. Гьал цулин мекІер яваш-яваштти фачучІая.

Гъава суварий ае хІуппахъанар аладиная, чиппин хІуппарин убадара фай, хІурин багулив фае гІанарихъди. Убадар агуф, Алпан, шад хъуна, гъуккай-гъуккай ушуная хІуппарилди. ФачучІуная ме дурхІас хІуппарил але сасра туллабурихъай, хупшай учин эессин гъиларис мезар атай хъучучІуная. ЙиркІурал ухъуная Алпанан учин джигъил вахттар. Улара элхъенди суман ая мин, алайкІуна мезра, руджра ттуттай, са шатти ая ягІа Алпан.

Гъамиштти алттушуная са халин ягъар. Вей-вей мекІ фартІая джиларив, ягъ-ягъалас ругъая хъеттар, нахширар хІуьлак вея ибгІа мукъарихъди вес, даран цІабара тІухай, хъюхъе вея.

Гъал хІуппарин кІаратІара ушуна кканди ая галариди, чиппин Іурд алдихъас гисаъ. ХІязурвелар аркъая хІуппахъ-анари рякъюъ учІас. Алпанра хІязур хъуная. Амма эесси тулла, файдина учин хулахъди, иртІанде синджилиъ. Чаб ушуная.

ХІуппарин убад вархал вередехІен, уларилас негъ-вар алавей хъуная Алпанан. ФачучІая ме, цІугІ алихъуна, Іешас, тич-мич аттуккас, синджилиъас адишас алучІай. ХІуппахъанара аргва вусари андава, амма Алпанан йиркІв фишттира сакин вей адава.

Ппара пушмалди ая ме, са щейъра ІуьтІанас акъас мутІяІ давей хъуная тулла. Гъал фикъасе?

– Ма вас яккун тика, – агъая Мурада, – ІуьтІен, Алпан, ІуьтІен, сара, час вун ппара кканде гъа.

КІиркІахъди къацІра алдаркунара кехІяй адава ме. Язукъ хъуная Мурадас чиппин тулла, адатуная ми Алпан синджилиъас. Адату суман, хІуьлак хъуна, гъуккай-гъуккай, гъишина, ушуная Алпан хІуппарин къабахъас, хъил фацуна.

– Ях, хІуппахъандин тулла, ях, – пуная Мурада, – вун убадин йиркІв э, вун хІуппахъандин дустт э!



Удач-гитан

Ме гитан уч учис хІайи аргвай, садра кехІай сай-мишди даркбай аруцаф хуная. Уч учин хІавелтра аркбай, адаркаяф куьчабуриъ. Ттура кехІай хьитІуна адавуйи мис. Са инсандисра ягІай адавуйи нандиъ ме гитани учин Іурд фартайчин, найисаъ гІулана ме авейчин. ВехІши хуна, архуная ме гитан, туллабурра ахъихбай, инсанарира гъайикай чиппин хІеятариъас.

Ме гитан уч ппара батІарф хуная – бицІи тарланис ухшардеф. Уч ІурчІеф, улар нур ицІанди гъазеттар, батІар шергве чІичІра алеф. БицІи шиниккварис кканвей хуная ме гитан, амма гитани учик кирхІас гъинара артай хуна адава.

Са инсанра дуламиш девея са хулан кІенакк ккие кърчаъ джинуьхбай хуная ме гитан, учис фачарху щейъра ІуьтІай. ЦІайлапан дехІен къатеф хуная ме гитан.

Са иса гІулана, фиштти ичира адиная шагъурдиъас те хуларин эесси, учин хал-хизанра хъай. Эессихъ хъай хуная Іу рушна са бицІи кІиркІ. ФачучІуная эесси учин хал кегъдивас, аккумуля мукъар батІар акъас. Шиникквар мин ушуная хІаятиди дурухІас.

Учин кърчаъас гитан гъал хъикІиная мебурихъ, къацІра даккканди ахуная мис учин вартталди инсанар

адина. Уч инсанарис дагвас, джинабаккес аттвей хьуная ме учин мугуйиъас мучIе хьугуна, джинабаккес хабра ача-вей хьуная. Ппара хъял кей ая гитанис ме хуланттарикес, учин хулади аде душманар суман ая гитанис мебур.

Амма фи пучира, са кар къабулде гитанис: гьал ме хулаъас ппара ширин IуьтIаттарин ниъар архьуная кIилди хIаятиъра, къурчаъра. ТемяхI хьучавея IуьтIаттарихъди гитанин.

– Агъ, – агъая гитани, – зун мисаъ гашила архьуная IуьтIаттихъас, мебури фи идже ямагар аркъая чиппис!

Джинди учIа гитан тIагариъас хулади, фай учис балугъра гьиша хаб. ХIаятиъ дурухIае Наиматас аргвая ме арайиъ гитан.

– Мисаъ гитан ая! Гитан ая! – пуна, гъарай акьуная Наимата учин ччиччис, Сарижатас.

– Нандиъ аяф? Нанди аяф? – агъая Сарижата.

– Магъа, магъа! Хье хулаъас, балугъра гIадагъуна къа-цIалагIас, ачишине къурчаъди!

Наиматра, Сарижатра гьал алгъ-узуная къурчаъ учIу гитанил. Яваш-яваштти ушуная мебур гитанин хуппахъас. Ая вас гитан, гъурр-мурр алихьуна, балугъра гъайхIай, гъа-зе улари нурара ицIанди. Рушар учис агуф, гитани къацIалагI цIуппи фацуная балугъ, фаттивас гучIай учи-



фас. Хъара Іайи гъурр алихъуна, гІадикІуная рушарис учин хІуьтте силебар. ГучІ хъуная рушарис, дахи-дахи аттиная мебур къурчаъас.

– Гъал, – пуная Наимата, – зас ягІар хъуне гитанин муг, зун ге гитанис Іелеф ицІанди акъасе.

– Хъин Іударира ицІанди акъасе, – пуная Сарижата.

Гъаме ягъалас тич ме чияри гъай хъуная гитанис батІар ІуьтІаттар: яккар, балугъар, нисар, неккра ккигъар-тай хъуная.

Сифтта гучІай, яваш-яваштти, ихъуна гураъ Іелефра, чаб вархал гъурзанди хъуная рушар. Гитан, мебур адегуна, кидирхІай са фиттикра гъурзанди хъуная, учин ханчІар адайкІуна, утунна агъихъуна, хъял кей, мавра алихъуна. Хуппай яваш хъуна, рушар вархал хъегуна, ІуьтІас фачучІай а ме.

Гъамиштти ягъ-ягъалас вардиш хъуная гитан рушарихъди. Учис Іелеттар фай адегуна, гъал са сакинди эркъвай хъуная ме. Гъал шибер лап багуливди гъучавея гитанин, ке идже ширин Іелеттара фай.

Са ягъа, фай гитанис неккра, адиная рушар къурчаъди, алихъуна усал гурра гъузуная мебур. Яваш-яваштти гъучадиная гитан, хъуттурфуная сифтта рушарихъ, хуппай неккдихъ. Хъуна неккдин ниъ, фачучІуная гитан мез кирхІай, некк ухас, хурр-мурр алихъуна. Рушарин сивар ушуная ибурарихъди дегъен: фи ухътанди агуная мебурис ме гитан!

Яваш-яваштти гъучашуная Наимат, афекъуна гитанин багулив, алайхІуная ми батІар гитанилас учин гъил. ЦІа киркъуф суман учис, кегъишиная гитан, йирхІуна мягІвра, алчишина, удуная Наиматан гъил. Иъ хъархъуная

Наиматан гъилихъас. Гъишина гитанигъас, адиная рушар хулади, чиппин бабан багуди, агвар акъуная уду гъил. Баба йирхІуна дарманра, алдитІуная Наиматан гъил.

– Сара гъучаева гитанигъди, – пуная баба мебурис.

Амма рушар фишттира вей хъуная гитанис фи-хъу-нара батІар ІуѳІаттар фай. Гитаник сара кирхІай андава рушари, хуттурфай, гъургъай аве мебур гитанихъай, амма Іайи багу вей андава. Тарлан суман батІарф идехІела, Тарлан агъа ттур алихъуная рушари ме гитанил. Гъал са вахттарилас Тарлан вардиш хъуная рушарихъай. Са-са гелай рушарин багу багъдиѳдира аттвей аве гитан, мебу-рихъай рагъуккра эркъва, ахттилатарил хъебра алихъуна.

Гъамиштти, гІул ккиркІвагунас, Тарлан керхъу-ная гъилик, гъал уч вей аве ме рушарин багуѳди. Амма сасра инсанаригъди багу вейдава гитан. ГІулра ккиркІу-ная, хулан эессибура хІязур хъуная вес хаб шагъурдиди. Рушарис кканди ая гитанра гъас чиппихъай шагъурдиди. Дадана, баба пуная:

– Гъас хъасттава ле гитан шагъурдиди, вардиш хъаст-тава ге шагъурдин хулаѳ. Ле уч училди хІа хъуна аеѳ э, къа-ѳІра ккан хъасттава лис уч хулаѳ ачикуна.

Рушарис Іешал керхъуна: ппара кканди ая мебурис Тарлан.

Ахиран гІулин ягъа Іар хъуна агуная Тарланас хал, тІагарара ѳІуппи алакъуна. ИркІв исал хъуная гитанин, рушар андай агуѳ.

Наиматна, Сарижат рякъюѳ ая, шагъурдиди хаб вей, амма йиркІураѳ Тарлан ая мебурин.

– Дардар маркъа, – пуная баба учин рушарис, – сайи гІулана хъин хаб адесе хІуриди, Тарланан багуди.



Къари-хІабаб

Авалдин вахттуни са хІуриъ ай хъуная са Къари-хІабаб. Гъемишанди уч учин фикирари хІуълак акъуф суман, са инсандихъайра дагъургъай, вей хъуная ме хІабаб. Кунара алиқІаф и агъа ги Къари-хІабаба суман, гъамишанди са джурайинттар, мучІеттар, цІуреттар.

– Фикъас вун пушмалди аруцаеф э? – агъай, хабар гъуршанди хъуная мифас хІуринттари.

– Зун сатти э аеф, нанна аркъайдава зун алтухълама шейъер, – агъай хъуная Къари-хІабаба.

Исанарихъай гъургъаф чІукъ ичира, амма Къари-хІабаб уч джаллабурихъас йиркІв руцІаф хъуная. «ЙиркІв угаф» агъай ве миштинттис халкъари.

Ме хІурин шиниккварисра кканвей хъуная Къари-хІабаб. Завал вей хъуная мебур мин багуъ чиппис хІикатар ахъакъуна кканди. Къари-хІабаба хІикатара ахъаркъа мебурис, учин гъилихъ хъае иджвелра аркъая. Учин хал касибди агучира, хулади адеф Іари адартай адава хІабаба.

– Я хІабаб, – пуная сагелай са руша мис, – фикъасе вун сатти аеф? Нанди ая ве шиникквар?

– Зе игит кІиркІ дегІвиъ кІини, хІабабан, – агъа Къари-хІабаба. Фиркъа зун, хІабабан? Хъе Ватан бадала учин джан йине зе кІиркІа, учин джигъил Іуъммур йине.

Гъамишттира пуна, уларилас негъварин тІинкІар ала-
вея Къари-хІабабан, хуппай рушан кІилилас гъилра алай-
хІай агъа ми:

– Гъал чун джалла зе шиникквар э, хІабабан.

Шиниккварис ягІархъуф, фикъас ичин ме хІабаб
сатти аеф, мебури гъал маслихІат аркъая ме Къари-хІаба-
бас фи-хъунара кумакар акъас. Сайи хъед гъая, сайи кІурар
къатІ аркъая, сасрайи – хІаят джикая хІабабан.

– Баркаллагъ, баркаллагъ, зе зурбабурис, – агъая Къа-
ри-хІабаба, – амма ппара бизар мева. Чун ях чве дарсар
хурас, Іакъулар гъушас. Дадар-бабари петтар акъе, чун
иджи вардиш хъас, чвакес гъуркІу инсанар хъас.

– Хурая, хІабаб, хурая чин! – агъая шиникквари.
Дадар-бабарилра иджи йиркІв алиянде чин. Часра кканди
ая, ве кІиркІ суман, игитар хъас!

– Агъ, зурбабур! – агъая Къари-хІабаба. – Чун сумант-
тар хъара ппара хъурай ме дуьньяйил, хъе ватан ккане-
ттар, хъе ери дадарин джилар ухІаттар, дадар-бабарис
хІуьлмат аркъаттар!





Ире цІантукар

Баб ачадина хулади пуная учин рушас:
– Зухра, шаб зе руш, хьин хье тІагарарин кІенакк батІар тукар узас.

Аттивуна бицІи ищигериъас гъар джураин тукарин тумар, файдиная баба рушан удигъди.

– Магъа тумар, – пуная баба учин рушас, – ме пиона-рин тум э, ме фиалкабуринф, ме астрабуринф, сасра тумара ая мисаъ. ЯгІа зун вас ягІар акъасе мебур узас.

– Хъурай, сара, баб, – пуная Зухрайи.

Аттушуна хІаятиди, гъушуна гъилиъ берра¹, кІетара, хІязур акъуная мебури Іударира тукар уза мукъ.

– Гъал узучира хъасе, – пуная баба.

Узуна гьер джураин тукара, адиная мебур хулади. Шавла хъучира, йиркІвар шатти ая мебурин, чиппин кар-дил ппара разиди ая мебур.

Садпуна ул керхъа Зухраин, аргвая са ищигихъ фит-тин ичи тум хъуми. Зухрайи бабафас хабар гъуршанде:

– Гъаме фи тум э, я баб, гъамисаъ амеф?

– Ле ире цІантукарин тум э, – агъа баба. Гъале цІанту-кар зун узундава, мукъра гъуркІундава гъалебурис.

Зухрай пуная:

¹ Бер – рукъан кІетІа.

– Зун гъеме цІантукар дахъичин хъе хІурин деГІвиъ кІеттарин памятникдихъ узасе.

Сасра ягъа, бабра хъай, ушуная Зухра цІантукар узас. БатІарди хъуруцуна памятникдихъ узуная мебури ме тумар.

Са халин ягъарилас Зухрайис аргвая чиппи тІагарикк узу тукари бицІи гъазе цІабар фартай. Гъуккай-гъуккай ушуная Зухра цІантукар фиштти айчугас. Ахъуная цІантукара бицІиди, шергве кІекІвар фагъатай хъидин Іашу джилигъас. Шад хъуная рушан иркІв. Гъал тІагарарикк узу тукарин чІал учи акъугуна, ушуна, цІантукаринра чІалра аркъай хъуная Зухрайи. Са-сагелай хъедра ахъарта руша учи узудегъен тукарис. Рушан ул ккей, ул ккей агъучІая гьер джураيين батІар тукар.

Са ягъа багамикестти Зухра кетІугуна, баба мис агъа:

– Зухра, тІагаригъас кІил адикІ, хъуттурф вун узу тукарихъ: фи ухътанди агъдиная гебур!

ТегІде хъуна хуттурфуная Зухра тукарихъ. Фи мухІтал хъуная руш, тукарин ухътанвел агуф! Зухрайис учис эмкІикес аргваяттар суман хъуная: фидегъен ухътан тукар агъучІуная, лап суьхІуърдин хІикатаригІ гІаеттар суманттар.

Астрабура, пионара ая дурухІай, бицІи шибер суман; ромашкабура ая джагварди, сусар суман, назукди¹ ламус аркъай суман фиалкабура ая мисаъ, бицІи рагъар суман къирагъарихъас элхъяй календулабура ая. Гьер джураيين батІар тукарин багъ хъуная Зухраيين тІагарин кенакк.

– Агъ, зе батІар тукар! – агъа Зухрайи. Чун фи батІарттар хъуная! Ул аттивас вей адава чвагъас!

Гъал тегІди-тегІди аликлуна учин кунара, Зухра ушуная цІантукар фиштти айчугас.

¹ Назукди – батІарди (нежно).

Фиштти ая вас! КъацІра тукарин багу рукъастти Зухрайис вархайилас димари аргвая ири-ири, цІа суман, цІантукарин тукар. ЙиркІв шад хъуна, адишас хІязурди ая рушан мухуриъас, вей дарукъай суман аргвая Зухрайис уч цІантукарин багуъ. Гъучарукъугуна аргва мис са пай цІантукар фатуна ири-ири цІабара, цІа суман угай, сасра пай тукарин ай хъуная ире гугара акъуна, адатас хІязурди.

Хъидин шавгъари туттас аркъая памятникдихъ агъучІунае цІантукар. Рагъу учин нур алартай рекІве аркъая цІантукар. КІилди дуъньяйикк нур ккетІуф суман аргвая ире цІантукар угай. Яваш-яваштти сасра инсанара гъучавея мич, са чІалра агъдархъай гъузая мебур. Зухрайин бабра адине са вахттунилас. Хуппай са Іуссе хІабаба агъая:

– Ми цІантукар лап джан кеяттар суман аргвая, кІилара туттай, фи ичира хъес пас кканди гъузуна аеттар суман.

Хъуттурфанде инсанар кІаре гъвандик ликІинае солдатарин ттурарихъ, хуппай ири, цІа суман уга цІантук тукарихъ, яваш-яваштти негъварин тІинкар алавей хумбарин уларилас.





Зе дадан чІал

Ке хІа девлет инсандин – учин дадан чІал э!
Хье ери дадари гьургъаеф и хье агьуларин чІал. МаслихІят аркъаф хье агьуларин чІалалди и, фикир аркъаф, Іекьул гьушаф хье чІалалди и, мягІнибур, миса-лабур, хІикатар аркъаф хье ширин агьуларин чІалалди и. Гьер шиникквди учин садпе чІал агьихьаф учин дадан чІалалди э.

Учин чІал ягІархьуб – зурба бахтт э инсандин. Хьин гьургъа чІала э ягІар аркъаяф хьин найе миллат ичин, хьес фушар агьайчин. Хьес агьулар агьаеф, хьин агьул чІалалди гьургъахІела э.

Хьехъ хье района хъая, хье джилара хъая, хье суварин бицІи хІурара хъая. Авал замандилас мич ликІиб айчин хье чІалалди, хьехъди рукъаси авалдин инсанари гьургъа чІалар, ликІи китабар, те вахттунин тІабиІатар, гІадатар. Са чІалалди, фи хьучира – инсандин дуламишвелдин тарих, Іаеф-иджеф.

Гьер инсан алулІуна кканди ая учин дадан чІал иджи ягІар акъас, дадари-бабари чиппин валадарис ягІар акьуна кканди ая хье ери дадари гьургъа чІал. Гьер инсандис учин ватан ширин хьуна кканди ая, учин чІал ширин хьуна кканди ая. Фидегьен вун кІилди дуьньяйикк ккируцучира

нандиъра сасра ватан вахъ хъастава. Хъе ватан – ве дадан хІур, хъе агъуларин халкъар, мукъар э.

Хъе агъулар ппара ая хъе джилил яшамиш давеяттар, хІа шагъурариди ушуттар, сасра хІуькуматариъра ая агъулар, идже лихунарил алеттар ая. Найе мукъуйиъ чаб айчира, амма хъе чІал йиркІуралас гъартай адава гебури. Хъе ватанихъ ппара цІиялди аве гебур, хъе ватан чиппин йиркІвари икІуна ухІая гебури. Чиппис маджал хъе вахт-туни, кІил дивас гІаттвей вея гебур, хъе сувар агвас, хъе булахарин хъеттар ухас, чиппин мукъу-кІилар агвас.

Хъе чІалалди хъин гъургъас алудучІучин, хъе чІал къацІра миндавай гуласе. ЧІалахъай хъе миллатра гуласе. Фушар пасе хъес хуппай?

Хъе чІал лап ухътанф э, ери рангунин рагъухъан суманф, дадан ватанин шавгъар суман ширинф э, къизил рагъун нур суман Іаквеф э!





Назперин дад

Назпери хъуная хІуппахъандин руш. Ппара DIRE руш хъуная ме: чиппин бабас кумакар аркъаф, дада петтар аркъаф, хІуринттарис хІуълмат аркъаф. Мерт-твелара хъай хъуная Назперийхъ, гъилин пешабура кей хъуная ме рушак. Гуьнна багуъас агъучІу тук суманф, гІикІунде чирагъ суманф хъуная Назперийкес.

Ме рушан хъучарукъувелар аргвай, чиппин хІуринттарин гІашкъра алхъуная мил.

Дад, шавла хъуна, хІуппарихъас адегуна, хІуъллак вей хъуная Назпери дадан лекарилас чакмабур алдахъас, дадас дахи-дахи куче ямаг агъиянас.

– Баркаллагъ, зе руш, баркаллагъ, – агъа дада, – фи Іакъулар кие руш хъуная захъ!

Назперин бабра ппара рази ая учин рушал, ппара кумак кеттархъая бабас рушакес хулан курар аркъагуна.

Сагелай адиная хІа шагъурдиъас кІедж Назперин дадас, шаб агъаф шагъурдиъди, мидал гъушанас, иджи учин лихун аркъахІела, хІуълкуматис ппара хъеяр, яккар, хІуппан нисар ицІанхІела. Мебурин мукъу-кІилар, майил-чарабур завал хъуная хІуппахъан рекъуъл акъас. Назперина баба хІязур акъуная дадан цІае кунар, цІае лекар, гич верегуна дада аликлас.

– Багамикестти дахи весе зун, – пуная хІуппахъанди.
– Сагъ саламатилди илгурай чун!

Авалдин вахттари ппара машинар аефттавуьйи, инсана-
нар шагъурариди верефи са хІа автобусдиъ ай, завал хъуна
багамикестти дахи. Верефра и чиппин са Іайи герекар ай
хъучи.

– ХІа шагъур фишттинф э, я дад, – пуна, хабар гъур-
шанде Назпери.

– ХІа шагъур са азманф, са ухътанф э, зе руш, – агъа
дада, – гъава мартабин хулар аеф э, ппара машинар аеф
э, заводар, фабрикабур аеф, майдан ирхе, ІирІе куьчабур
аеф.

– Засра агвас кканде хІа шагъур, – агъа Назпери, –
зунра вахъай фаях сара, дад.

Дадна баб сад сийхъ хъутурфуная, хабди дада агъа:

– ХІязур ухъ, гъасе, зе руш.

Багамикестти, учІуна автобусдиъ, вея мебур шагъур-
диъди. Назпери шатти ая, уч дада гъаяхІела учихъай. Ме
садпе гелай э веяф шагъурдиъди.

Сифтта гъучархъа мебурис Магъу-дере. Ме дерейин
те багвра, ме багвра гъава дагъарар э. Дерейин кІенаъас,
акъуна са ирхе хул, ун алихъуна, нецІв ккевея, гъванарилас
гъванарилди алайчай. Назперис гуч вея ахтт хъуттурфас,
уч автобусдиъас аттархъаф суман аргва мис.

Гъал ме сасра багухъ хуттурфанде, дагъарарик кие
дарарихъ. Гъава дагъарарик кие кІурар хъебаттар ичира,
амма чаб ппара ухъттинди аргвая. Гъазе хъей але хІуппа-
рин хІа убадар нецІваригъас вартт, гъава дагъарарин ккан-
ччарилди ккегъвеяф суман аргва Назперис. Дар кеяф
са гъванкІар багук э. Магъу-дерейин гуьна багв кІилди

дагъарар э. Назперис гъал уч бицІи джакъв суман ве, ме дереййъас ахтт веяф.

Магъу-дере ккиркІуф, Назперис аргвая сасра джуж-райин сувар, дарар, хІурар. Гъал автобус вея ттуълле ас-фальтилас, майдан рекъерилас. МуьхІтал хъуна, хуттур-фандея Назпери цІае мукъарихъ. Вей-вей, чаб вархал вередегъен, Назперис аргвая сувар хъеба вей, чулар, май-данар ачух вей. Дада рушас агвар аркъая чулле Каспий хІуъл.

– Я дад, я дад, – хабар гъуршанде руша, – гъете хъес аргваеф кІилди хІуъл эв? Фидегъен ппара хъед ая гъете хІу-лиъ!

– Э, зе руш, гъете кІилди хъед э, амма те хъед къеланфе, те инсанари ухафттава, – агъа дада.

Дада агвар аркъая учин рушас емишарин багъар, тІи-битІарин бусттанар, батІар машинар, хІурар. Гъемиштти, ахттилатара аркъай, рукъая мебур хІа шагъурдиъди. Назперис гъал аргва гъава мартабарин хулар, рекъериъ ацІуна машинар, куъчабуриъ ацІуна инсанар. МуьхІтал хъуная руш. Дада, фацуна гъил, дахи гъая ме учихъай, амма Назперин улар адаркая ери багуъ. Алайшина, эркъ-вая мебур чиппин багунттарин хулаъ.

Багамикестти Назпери кетІастти, дад ушуная шагъур-дин администрациди.

– Назпери, хъин ягІа аттвесе байирдиъди, зун вас хІуълла агвар акъасе, шагъурра агвар акъасе, – агъая рушас Магъи-абаба.

Акъуна чиппис багаминттара, аттве мебур куъчай-иди. Магъи-абаба гъае Назпери паркуниъди. Гисаъ са азман гъер джужрайин кІурар ая, батІар тукар узуная, фон-танра ая, качелибур. АцІуна инсанар ая паркуниъ: хІаттар,

бицИтттар, Іуьссеттар. Назпери учІуне качелибуриъ, фонтанихъдира ушуне. Нур ицІа арсуран маргъар суман аргвая Назперис фонтанин ича хъеттар, ул алттадивай хуттурфая ме фонтанихъ. Магъи-абаба мороженое гъушуне Назперис, хуппай хІуьлихъди ушуне мебур. ХІуьл ая учин лепебу-рра атай къумарис, са лепе сасрайихъай фартай тегІди-тегІди, джан але аждагъа суман, къацІра сакинди адава хІуьл.

– Вас гучІ мевa, Назпери, – агъая абаба, – ме хІуьлихъди ацІуна инсанар вей ве гІулана, эл ккетас, шавлавелар алатас.

Алдахъуна чиппин лекара, гъучушунaя мебур хІуьлигъди. ХІуьлин лепебур гъал удигъ вей, хаб вей Назперин къацІул лекарис мез атай. Рушан гучІ гъал гулуни. Мис тамаш вея гъал учин лекарин хъилариъ фиштти къелан хъед гъурзанчи. ХІуьл гагъ чулли аргвая рушас, гагъ – гъази, гагъ – харчІидина¹ хъюхъи. Ппара шатти ая Назпери ягІа!

Хаб хулади верегуна, Магъи-абаба ачафайшуне Назпери са батІар диквандиъди. Рушас мисаъ ппара бегелмиш хъуне ире ттуфлибур, абаба гъушуне ме лекар Назперис.

Хулаъ, аликІуна учин цІае ттуфлибура, аладаркай хъу-ланди лекарихъ, шатти адаркая руш те хулаъас ме хулаъди. Назперин дадна ХІаким-адад хулади верегунас, Магъи-абаба батІар Іелеттар аркъая. Са халин вахттунилас дадра, ададра хъай ачахъадине хулади, фaй ацІуна савкъатара.

– Нахъи, дад, ве медаль? Агвар акъе зас! – пуная Назпери.

– Магъа, зе руш, магъа, – пуна, аттивуна ире махп-пурин къватигъас агвар аркъа дада учин медаль. ХІаким-ададра, Магъи-абабра, Назперира, ул аттидивай, хъут-

¹ *ХарчІеф* – завун ранг алеф.

турфади ая хІуппахъандин къизил медалихъ. ХІуппахъандин сифат шатти ая, амма уларихъ негъвар хъикуна: ме медаль хІуппахъандин джафа э, мучІе, ругъу Іуьшар э, угъал угъа ягъар э, загъмат дивай, абанкъулдилас алайде эмкІ э.

ХІуриди мебур рукъугуна, вари инсанар завал хъуна-ая хІуппахъандин хулаъ, мис мубарак акъас адинаеттар. Идемари ахттилатар аркъая, хумбари Іелеттар акас кумак аркъая Назперин бабас.

Назперира ая кумакар аркъай агъиянас, гъаттивас Іелеттар гІалашуварис, гІалахъирарис. Ми учин цІае ире туфлибура, цІае берхІемар агвар аркъая адинаеттарис.

Джалла аде гІалахъирарис Назперин баба савкъатар йине, Іесидабура пай акъуне.

Вари шатти ая: ягІа ме хІуринттарин хІаягъар э.





ХІуппахъанна хІуч

Гъава суварий ухІай учин хІуппарин убадра ай хъуная агъуларин хІуппахъан ХІаджиІуьмар. Ме загъматин кІил суманф хъуная. Ппара гІашкъ алди хъуная мин учи аркъае пешайил.

Хубжи исар хъуная ме идемин хІуппахъанвел аркъай. Гъамиштти идехІела, ме хІуппахъандис хІуппарин гьер дарди-хІял хІай хъуная. Учин убади ае гьер са хІуппан хъуьссу хІай хъуная мис, гъар цІегъелан хасиятара хІай хъуная.

Хъацуна учин литра, гъушуна хили ресра, фай учин убадра гъава суварин кІиларил адаркая зурба хІуппахъан. Ме гъава суварин найи мукъуйиъ фи къулла айчин, фи ІуькІ айчин, фи чайлах¹, дагъар айчин дузди хІай хъуная ХІаджиІуьмарас.

Са хІа джанарин идеми хъуная ме. Гъургъагуна, са сувалас сасра сувади унвей хъуная мин джилар. Учин вата-нин суварил, чІирарил бахилди, батІар мегІнибур аркъай хъуная хІуппахъанди гъава суварил.

ХІуппарин убадигІ хІучар гІидишас, ХІаджиІуьмара ухІай хъуная са хъибу тулла. ХІуппахъанарин туллабур ке зурбаттар верефе, ке гуджар хъаеттар э, ке Іакъул кеяттар.

¹ Чайлах – сувар, сарин кІукІар, гІарар.

Ппара кумак кеттархъай хъуная ХІаджиІуьмарас ме тулла-
бурикес, сатти убад ухІахІела. Са нахшир, са вяхІши хІей-
ван гъучартай хъуна адава хІуппарин убадигъди ми вар-
диш акъу туллабури.

Пешкъ алди ухІая хІуппахъанди учин туллабур.

ХІаджиІуьмар, хІуриъди аладегуна сувахъас, бицІи
шиникквар Іеламат хъуна хуттурфанде хІуппахъандихъ.
Фикъас пучин, хІуппахъан, угуна рагъари, йирхІуна тире-
бари¹, суван аждагъа суман аргвая.

Амма йиркІв ме инсандин иджвели ацуф и. Учин
хІуринттар, мукъу-кІилар, майил-чарабур, хулар-хиза-
нар мис ппара кканди хъуная. ХІуриъ цІакинар аягуна,
ХІаджиІуьмар, лиІура суман цІаттуна² гъилара, аларцвай
лихъванф хъуная бицІи хІурин гимил.

Сагелай, фатуна учин кІаратІра гъава суварий, экъу-
ная ХІажиІуьмар суван кІилил, учис хІуппар иджи аргва-
гъилди. Са арайилас аргва мис учин убадихъ хуттурфан-
ди гъузунае са хІуч. ГучІай туллабуригъас, убадигъди багу
вей хъуна адава ме хІуч, амма хабра гъайчІвай дава ме.

ХІаджиІуьмарас ягІархъуная ме хІучас Іайи гаш ккиеф.

– Гул лидас, – пуная хІуппахъанди, – дахъучин зе
туллабури вун руг-руг акъасе .

Са пушмалди хаб алдаркуна ушуная хІуч сувариди.
ХІучан агубарилди ягІархъуная ХІаджиІуьмарас ме Іуссе
хІуч идеф. Іуьшахъди, савусал акъуна учин убадра, алафай-
дина укунилди, ачикуная ми гІанаъ. ХІажигІумар ушуная
гъархъас кумайиди.

Са вахттунилас, Іуьшан са пай алттархъегуна, тулла-
бури алихъуная завкъ. ХІуппахъандис ягІархъуная уба-

¹ Тиреб – кулак.

² ЦІаттуна – дахъуна, дагъуна.

дин багуливди хІуч адина аеф. Сасра ягъара аргва ХІаджиІуьмарас хІуч алгъузуна аеф хІуппарин убадил. Суван парзулас, атай убадис улара, ая агъай хІуч, хъаттархъу хІуб, ккел айчугай.

– Агъ, суварин джанавур!

– агъая ХІаджиІуьмара. – Фикъас алттархъафттава вун зе убадилас?



Найич убад ушучин, гъагич ахъихъуна вей ая ме Іуссе хІуч. Амма са фера акъас дахъуна, туллабуригъас ул гъай, шавлара хъуна, пушмалди кІилра кейхъуна, хаб сасра сувариди вей хъуная хІуч, фи ичира Іелеф фачархъай чугас учис.

ХІаджиІуьмар вея, учин убадра фай, цІае чІирарилди, сувалди. Сувалас сувалди гъая ми учин хІуппарин убад.

– ІуьтІен, баркаванар, ІуьтІен, – агъая хІуппахъанди, – чун батІарди тухъ акъасттегъен ІуьтІен.

Уч, экъуна булахин кІилил, учис гунира Іелди ая ме, батІар тукарис улара атай, ширин ругъу булахин хъеттара ухай, суварихъра хъуттурфанди.

Сувар ая, гъазе махпшур дивуттар суман, завар харчІе ранг йирхІуттар суман, са-са мукъарил джагвар къирибур алди. Джагвар къирибур гъава заварил са ухътанди аргва: гвадар-гвадар хъуная джагвар хъеяр суман.

КІилди суварикк ккетІуна ая уъттарин ниъ, суварин батІар дарман кие ІуькІерихъас вей.

– Ай, дунья, фи ухътанди ая ле вун! – агъая ХІаджиІуьмара. – Фи ухътанди ая ве чІирар! Фи ширинди ая нахширарин джилар, булахарин, нецІварин унар!

Бахилди учин ери дадарин ватанил, ул адаркая хІуппахъанди гъава суварий. Парзал гъузуна, гъате Іуссе хІучра аргвая хаб ХІаджигІуьмарас.

– Агъ, суварин джанавур¹, – хъагъая хІуппахъанди, – хъаттархъайдава вун зе убадихъас! ХІайиф и, хІуч, ве джигъил вахттар, зарб фай вун адаркагуна ери суварий.

Іуьшахъди, савусал акъуна учин убадра, тІушуне ХІаджиІуьмар учин кумайиди. ХІучра алме парзал. Гъал язукъ вея хІуппахъандис ме Іуссе хІуч. Фацуна са Іатте хІуб, руккуна, алихъуна чІирил, арта ми хІучас ме хІуб.

– Магъа, хІуч, вас зе багуахъас хІуб! – пуна, гъарай ахъихъа ХІаджиІуьмара. – Амма сара вун зе убадихъ хуттумурфа! Закес вас сара кеттархъаф андава!

ХІаджиІуьмар тІушая кумайихъди, хІуч, гъавурди архъуф суман, яваш-яваштти тІушая рукку хІуппан джандакин багуди.

ХІажиІуьмар, фай учин убадра, хъай учин туллабура хъайина кумайилди, йиркІвра сакин хъуна, гъархъуная.

Гъамиштти алттвея гІулин батІар ягъар сад сайихъ хъай. ХІажиІуьмар ая бахилди гъава суварил, ругъу булахарил, учин хІуппарил, ккеларил.

ЦІаде ягъ дагъай, угъа ягъ дагъай адаркая гъава суварий хІуппахъан. Туллабура фая чиппин эссин багулив, убад ухІас кумак аркъай. Са-сагелай суван парзарисра улар йирхІая ХІаджиІуьмара, амма са хІучра, са суван нахшира, са вехІши хІейванра² аргвай андава сара те парзарил.

¹ Джанавур – хІуч.

² ВехІши хІейванар – чІирарий дуламиш вере нахширар.



Цулин вахтт

Сувариди цул са тегІди вея. Сентябрьдин ахирас фачучІая, уыштт алихъуна, адес цулин ругъу кулакар, аттархъа мекІер. Багамикестти дахи, рагъун ибгІа нурар йирхІастти джиларис, чІирарил, кІурарин рукъае цІабарил, аргвая Іуышуй аязи алихъуна джагвар ибхъин ручІ. КІилли, илгунди аргва ручІ, рукъунае чІирарил, ибгІа рагъугъас гучІай, джинди Іуышан вахттуни адеф суман аргва.

Гьал рагъун нурар йирхІуф джиларис, алмазари суман нурар ицІас фачучІуная ручІ, хуппай, рагъ къате вередегъен, яваш-яваштти, мертте хъеттин тІинкар хъуна, ушуная джилариди.

Гьал, фай учин хъюхъе пайдагъра, цул рукъунаеф хІисаб аркъа мич. Гъеме вахттунилас тич фачучІая дарарин цІабар рукъай алахъас, чуллари ае чІирар чІигея¹, булахарихъ, нецІварихъ ае хъеттар гьал вей-вей ругъая. Музи-музи угъая цулин угъалар, ягъ-ягъалас вея мекІер, нахширарин къушумар тІушая, хІалак хъуная вес ибгІа мукъарихъди.

ЦІаде цулин ягъари ппара батІарди аргвая дуньягъ. КІилди джиларикк ккихъунаеф суман аргва са ухътан халича, гъар джубрейин рангарилди рухуф: мисаъ ире

¹ Чигес – тІухас .

рангра ая, хъюхъефра ая, бурефра ая, са-са мукъаригІ гъазе рангара гІая.

Заварра ппара ухътанди ая – харчІидина чулли ая. Гъава завул але къизилдин рагъу, учин нулар фартай, кІилди джилар ибгІа аркъая. Цулин рагъ ппара ширинди ая, гІулин рагъу суман угас аркъай адава.

ЦІаде ягъари инсанари яхІ аркъая цІулин мяхІсулар алчагъас чиппин хуларилди. Малар ухІаттари, файдина, чиппин Іуьккер цІуппе акъас яхІ аркъая. Суварин рукъу ІуькІерин ниъ лап ширинф э. Ме вахттуни суварин хІурариъ рукъу Іуькерин ниъар архъая.

Инсанари яккара рукъас аркъая чиппис Іурдис. Суван хІурарин яккар, уьттар, нисар, ччамар ке ширин тІегІам хъаеттар э. Гъава суваринъ ае хІуппарин убадар хІуппахъанари алахъагъая ахтт, хІурин багуливди. Гъал суваринъ микІилде, суварин кІиларил угъуная джагвар ибхьер. Джагвар бармакар аликуттар суман аргва сувар.

Хъе уларис ппара кулар даргвайчир, амма хъес иджи хІая фиштти хІуьлакди айчин нахширар, Іурдис хІязурвелар аркъай. Мебури гъартти, Іурдин мекІер фатІастти, чиппин мугар цІуппе аркъая, чиппис Іурдана ІуьтІаф гунтІ акъуна, цІуппе аркъая. Музе зибзар, тІутІар, къваницаар, чуькІер – мебур джалла джинуьхъая ІачІаринъ, джиларикк. Мебури Іурд гъагиштти э алдихъаф.

Ппара ухътанди аргвая цулин алайку Іуьшар. Вазала учин нур нуралахъай алартая гъархъу джиларилди. РекІве гІадар, завун Іекве улар суман, хуттурфанди ая деребурихъ, суварихъ. Мишттин цулин Іуьшар хъегуна, вея ягъра цІадеф верефе. Рагъ але ягъ хъе вахттуни, ппара ухътанди аргвая цул.

Цулин рагъу ибгІа акъу джилил, учин къвалас рагъра ицІанди фаттихъуная урчІе гитан.



Ватан

Фиттилас эгъан исандин йиркІураъ архъаф кканевел учин ватанихъди? Фишттин кканевел эгъан гъаге?

Ватан! Гъеме са чІалахъ лап ппара мягІнабур хъая. Ме ве суван хІурра э, ве халра э, вун хунае мукъра э, ве сувар, булахара э.

Ватан – нахширарин къушумара э, ве хулан вартталас тич вере, заварил але джагвар къирибура э, ве тІагарин удигъ гъае чІирар, кІурара э.


Ватан – бицІи хІурара э, инсанарина машинари ацІунае хІа шагъурара э. Хъе ватан – зурба инсанара э, идже агалкъунар¹ аркъае, чиппин Іакъулдилдина загъматилди ппара хайир файдеттар хъе хІуькуматис.

Ватан азман, ппара кулар, цІабар кие хІа кІур суман э. ФидехІен хъин алуцІучин хъе ватан ухътан акъас, гъегедеген ухътан хъас ккея хъе ватан. Хъес гъерттис бурджлу э ме дуьнья мертти ухІуб, чиркин даркъай уч хе ватан. Хулара, байирдира инсан уч такабурди² руцай кканди ая.

Гъер инсандин йиркІураъ учин ватан ай кканде. Гъер инсан хІязурди хъуна кканди гъер вахттунни учин дадан

¹ Агалкъунар – бегъем акъу лихунар, курар, гъунарар.

² Такабурди – абурдалди.



ватан ухІас, учин ери да-
дарин ватанихъас, лазим
хъичин, учин джан ес.

«Ватан, баб суман,
ухІуна кканеф э» – агъа
мисала аефе халкъдин.

Баба суман хІа
аркъая хъин хъе джили,
учин булахарин хъеттар
ухас аркъай, учин джи-
лиъас агъучІу мяхІсулар
ІуьтІас аркъай.

Джил бадала хъе ери дадари чиппин Іуьммуар язукъ
акъундава. Гъал хъинра гъагебурис ухшардеттар хъуна
кканде. Гъар инсандис ягІар хъуна кканди ая учин бина,
учин джил ухІас, учин чІал ухІас, уч ае ширин дадан ватан
ухІас.

Авалдин инсанари агъафи: «Руг рухъейчира, хъед
ухайчира, ватандиъ иджи э». Гъагиштти идехІела, гъар
инсандис учин джил э хъудуърхъеф. Учин джилин хъедра
гъер инсандис ширин э, дивае элра дарман э, гуниг кьа-
цІра хайир киеф э джандис.

Ми дунъайил сасра ухътан ряхІятин мукъар айчира,
амма инсандис ке багъа э уч хе ватан, учин ери дадарин
чІал, учин чІалан миллат. Хъе ери дадар, ватанилас
кІина алайшуттар – хъе бунер¹ хІисаб э джиларикк ккие.
Инсанари хум гъатуна ккандава хъе хІададарил алчархъу
ягъар-Іуьшар, файшу дегІвибур, хъе джил бадала, ватан
бадала, хъес Іакве рагъ але ягъ агу бадала.

¹ Бунер – мерІер.



Суваритъ

Августин ахирас зун агъушуни зе бабахъай сувади, Гъибгъер¹ акъас. Багаймикестти лап дахи гъайи-шина, тІушуни чин фай бидонара вес сувариди. Рагъ фа-гъучІастти кьибла багв завун са ухътанди уйи, гъар джуъран рангар йирхІуф суман. Мисаъ ире рангра ая, кІуранин-хъюхъефра ая, тукун-хъюхъефра ая, бадунджа² рангра ая, беневша рангра – вари рангар. МучІевел ккиме завул, ппара Іеламатис батІарди аргвая. Бахил хъуна ме рангарил, гъейран³ хъуна гъузуная зун, ул алттивас давей заварин кьибла багулас.

– Фие вун, Камила, гъузунаяф? – агъая баба. – Шаб, дахи шаб, къана хъасе хъес дахъичин, куче рагъуккес четин хъасе руцас.

ТегІде хъуна, гъукк йина, хъучархъуне зун зе бабахъ.

Вей-вей суван исал рекъди, агъархъая чин вартти сувариди.

Мисаъ гъазе чІирарил, батІар хъюхъе тукарил алихъуна ругъу чиг алме. Рагъун нулар йирхІуф, чІирарил але чигик джан керхъуф суман хъуне. Ери рангунин ра-гъухъан суман, музе хъуна, джиларис йирхІу, гъар джу-

¹ Гъибгъер – ккабашккалар.

² Бадунджа ранг – фиолетовый ранг.

³ Гъейран – тамаш хъуна.

райин нур ккетІуна агвая чІирар. Фи ухътанди аргва ме вахттуни хье чІирар!

Шад хьуна цІае ягъ адеф, нахширар фачучІуни мягІ-нибур акъас, булахарин, нецІварин хьеттар дурухІай-дурухІай тягІди, шатти алайшуне, алихьуна хух.

– Я, баб, – пуне зун зе бабас, – фи ширин ниъ ая гъаме суварий!

– Ая, зе руш, ая, – пуни баба, – ме батІар ниъ хье суварин дарман кие ІуькІеринф э. АцІуна чайин ІуькІвер ая э хье суварий: уриъар, уникІер, хІешвар, яманин¹ кІурар, гъибгъерин цІабар. Гъамебур джалла ая хье суварий, зе руш.

Аркъай бабахъай ахттилатара, рукъуне чин суван хІа нецІухъди. Баба пуне зас:

– Ме нецІв Іайи къатефра э, Іайи ругъуфра э, зе руш, гъал бабан вун хъахъ зе гІунарихъ, зун алттгъасе вун те багукди.

Баба алдахъуна учин лекар, гъушуне гъилиъ, афукъуне джилиъ, зафас учихъ хъахъас верегъилди. НецІун те багукди рукъугуна, агуне час тисаъ гъванкІар багук кея бицІи булах. Гъазе чІиригІас ширинди-ширинди алавея булахин хьеттар. Экъуна гъеме булахил, акъуни чин час багаминттар. Фикъасчира ягІайдава, амма ме суван булахил ІуьтІу гуни ппара ширин вея, хулаъ дала. Чав фае шушайиъ хъедра агъатуне баба, вартт сувади агъагъас.

– Магъа сувариди вере рекъ, – пуне зас зе баба. – Ме гъвандин авалан рекъ алихъуф лап авалан хаза – базиргенари² и, ме рекъ – гъегебурин загъмат э.

– Фушар и гъаге хаза-базиргенар, я баб? – пуна, хабар гъушуну зун зе бабавас.

¹ Яманин кІур – рагъухъанар.

² Хаза-базаргенар – ариш-варишчибур.

– Гебур хье валаятин инсанар давуи, бабан. Гебур девебурин убад хул акбуна, алихбуна девебурил кьакъара вере базаргенар и. Караванар агъай и гебури чиппис. АцІуна багъайин шейъер гъайи караванари са хІуькуматиъас сасра хІуькуматиди: къизилар, арсар, багъайин ягълукъар, кьумашар, халичабур, багъайин кьудакъар, леъер, сасра багъайин шейъерра. Хье гъеме суварилас тич алдеа гебурин рекъер, хье суварин гебури Іуьшар аркъа мукъара ая.

МуьхІтал хбуна, хутгурфанди илгуни зун ме авалан гъвандин рекъерихъ. Зун садпе гелай и адинаеф ме сувади.

– Шаб, тІуш, Камила, – пуне зас баба, – хьин вартт агъушуна кканди ая. Тисаъ ппара гъибгъер ахъасе.

Гъаме авалдин рекъ ихбуна агъушуни чин гъава сувариди. Зас зун са авалан вахттариъ аеф суман вейи, мишттин ттуълле гъвандин рекъуъас верехІяла. Фи ухътанди акбуная ме рекъ! Ппара загъмат алихбуна ая те инсанари ме рекъуъл, Іераба вере дегъен ІирІи уйи ме рекъ.

Агъархъуне чин гъал гъава сувади. Мисаъ баба зас агвар акбуне караванди Іуьш акбуна уйи ттул¹. Гъаме ттулдилас кІилди дуньягъ аргвая: варха сувар, чІирар, дарар, чайлахар, нецІвар.

– Фи ухътанди ая хье сувар! – пуне зун зе бабас – Мисал зас зун заварил алеф суман аргва!

– Гъал гъибгъер гунтІ акъе, зе заварин нахшир, – пуна, элхъюне баб.

Гъал йиркІурал хъуне зе, фикъас адеттар ичин чин сувариди. Ул керхъугъилди аргвая зас гъазе чІиригІ фадахбунае, ире маргъар суман, ме ттул алацІуная гъибгъери. Баба тегІди-тегІди завал аркъае гъибгъер бидо-

¹ *Ттул* – майдан джил, гал.

ниди, зунна фачучІуни зе бицІи бидониди завал акъас. Ппара ая мисаъ гъибгъер. Са вахттунилас ацІуне че бидонар.

– Барккалагъ, зе рушас, – пуне баба, – ацІас акъуная магъа бидон. Шаб гъал хулади вес.

Суваъас рехІятти аладине чин са гъаме авалдин рекъди. Бабан гъилра фацуна, нецІугІасра гІаттине зун. Августин куче рагъу ме нецІун хъед ибгІа акъуна уйи, зас къацІра ругъундава, амма нецІун кІенаъ ае гъванар лап Іайи шергветтар и, зе лекар чурхайи гебурилас. Баба зе гъил фадацунайчин, зун гІархъафи гъаге нецІугІ.

Ппара шавла хъуне зун хулади рукъагунас, амма йиркІв ппара шатти и, ппара ширинди гъархъуни зун. Іуьшуй эмкІерикес агуни зас авалдин хаза-базиргенарин рекъер, девебурин караванар, ацІуна щейъера алди, че суваригъас тич вей.





Че цегьер

Чин гъамишан ухІаф и хулахъ цегьер. Фикъас пичин, цегьерин неkk ке дарман киеф хІисаб аркъа. Пулана че хал арцІаф и шагъурдиъас аде че багунттарин шиникквари. Баба гебурис багамикестти ицІанфи, уц агъихъуна, цегъелан неkk. Цегъелан неkkукес са идже нисра аркъафи баба, масттра аркъафи, неkk ашунигІ, ракъигІра агІартафи. Лап ппара хайир кие щейер э цегьер, амма чаб ухІас лап четингтар э. Раккариъас, тІагарариъас хулан гІанади учІас алучІа гебур, учІутуна, хал лап барбатІ аркъа – кІен багв варттал аркъа хулан.

Сагелай дахъуна илгуная че тІагар. Че цегьер чиппис гІулин рагъ куче хъухІела, адине хулахъди, агуна дахъунае тІагар, джалла хъибудара, хъай чиппин мудурара, учІуная че хулаъ. Гъал мисаъ мебурин цІакІинар хъуная. Хъибудара цегьерира, хъибудар мудурарира дурухІай къацІра миндай аккетуная мебури че хал – алгъучІуна усттулилди, вазайиъ аедегъен къанфитар ІуътІуная мебури чиппис, тІагарарихъ узунае тукара ІуътІуная, че диванарилди алгъучІуная мебур.

Са вахтгунилас вартти мартабиъди час унихъая цегьерин унар. Баб хулаъ адавуйи. Джалла чин шиникквар, аладина ади хулади, адикуна цегьерна мудурар, гъаркъа акъуне.

– Гьал фикьасе хьин? Фи пасе хьин бабас? Хьин варт-тал дурухІай ая вахтгунни, ади хал барбатІ акьуная цІегьери, – пуне зун.

ГучІай бабагьас, дахи-дахи кккегъдивуна, батІар акьуне чин ади хал. Сайи хал джикуни, сасрайи усттул мертт акьуне, аметтари диванар дуз акьуни. Цегьери аргІас акьу ваза аттфайшуне хулаъас, тукарис фиркьай-чин ягІар хьундава, фас пичин, тукар кьацІра миндавай ІуьтІуна уйи.

Са арайилас адине кардилас баб. Агуна че пушмал хьюссубур. Баба хабар гьушуне чавас:

– Фи э акьуф? Чун фикьас пушмалди аеттаре?

– ЯгІа зас йиркІуралас алттархьуне хье тІагар алчакьас, – пуне зун, – хье хулаъ цІегьерна мудурар учІуна уйи.

Баб дахи-дахи алайшуне ади хулади, хьадурфас, фи ичугас цІегьери акьунаеф.

– Са фиттинра язукъ дава, – пуне баба агъадина вартт, – зун ге хал Іуьччасе, амма зе тІагарарихъ хъае тукар зас язукъ хьуне. Садра миндавай ІуьтІуна аяхи гебур цІегьери.

– Чин вас цІае батІар тукарин тумар гьасе, абаб, – пуне че хулаъ ае шиникквари.

– Баркаллагъ, зе чаркквар чвас, баркаллагъ, – пуне зе баба.

Іуьшахъди аттхъархьуне че цІегьер чиппин мудурара хъай. Са шатти ая мебур, са бахилди дурухІая мебур чаб чиппихъай.

Гьал фи э мебурис аркьаф, агъаф че баба?

Са фера!



Турист

Ахиран вахттари че хІуриди ппара туристар веа. Че хІуринттари ге туристар алайшина, экъвас аркъае чиппин хуларий. Фикъас пичин, че хІурий гости-ница адавехІела.

Сагелай зе дадара файдине че хулади са турист идеми. Ме идеми и Карелияйиъас адинаеф хье Дагъусттандихъ хъуттурфанас. Гъал ме идемис кканди ая адаркас хье гъава суварий зе дадра хъай. Ме турист и гъава джанаринф, уч яхунф, буре чІарар алеф, харчІе улар аеф, уларил гІейна-бур алеф. Мин ттур и Дмитрий.

Дмитрий гъургъай уйи захъай Іуърус чІалалди, учин альбомарик кие ишкилар агвар аркъайи ме туристти зас. Ппара ухътан мукъарин ишкилар аттивуна уйи ми, лап ппара бегелмиш хъуне мис хье сувар, хье инсанар.

Сасра ягъа зунра, дадра, Дмитрийра хъай агъушунни чин че суван Ерге Іуърахъди. Ая Ерге Іуър чулли-чулли хъеттара ай, мертти-мертти, завул аледегъен джагвар къи-рибур аргвая мисаъ ае хъеттикес. Іуърахъ хъуруцуна ая гъазе чІарар, гьер джурайин батІар тукар. Гъал туристти фачучІуна атая мисарин ишкилар, Іуъран те багулихъди вей, ме багулихъди вей. Зе дадавас хабар гъушая ми мисаъ ае батІар тукарин, ІуъкІерин ттурар. ЯгІа ппара ишкилар

йирхІуне гІалашува суварин, дагъарин, гъар джураин
гъванарин, ІуькІерин. Сувариъ час алчархъуне хІуппахъа-
нарна хІуппарин убадар, малархъанарна маларин луджар.
Туристтис ппара тамаши хъуне хъе ккеларил, хъе урчарил,
хъе хІейванарил. Зера, даданра, учинра хъай ишкилар
йирхІуне ме сувариъ туристти.

ХІуриди хъайи вахттуни, че хІурин авалдин хуларин
ишкилара йирхІуне туристти, авалдин къабарин ишки-
лара йирхІуне.

Ппара хабарар гъушуне ми авалдин вахттарихъас,
авалдин къабарихъас, те вахттунин кунарихъас.

Дмитрий хаб вес хІязур хъе вахттуни, зе баба йине
мис ттунин са шевекера, авалдин са къабра. Шад хъуне
ме, часра шаб пуне чиппин Карелиди, батІар чулле Іуъра-
рихъ хъуттурфас. Белеки, зунра мус-хъунара аттархъас
идеф хъасе Карелиди.





Љавда

Меґелимди пуная шиниккварис:

– Багагъ хъес контрольный хъасе, чун хулаъ батІарди йиркІурал акъе хъе алттушу дарсар. БатІарди хІязур ухъ контрольныйхъди.

Меґелимди пеф суман, сасра ягъа сифтта дарсуніъ хъуная контрольный.

Вари шиникквар алучІуная акъас чиппис меґелимди йинае заданибур. Джалала хулаъ са фера акъуна адавуйи, китаб къацІра хулаъ дахъуна адавуйи. Гъал джинди улара атай Расулас экъуна ая ме, са фера акъас учивас агъда-рукъай. Расул ке иджи дарсар хура кІиркІ э ме классіъ, ке ппара Іекъулар киеф, ке сабур-абур хъаеф. Миштти идехІела, Расула алучІуна аркъая учин контрольный са найичра хуттудурфай.

Са арайилас Джалала яваш-яваштти, джинди агъая Расулас:

– Расул, я Расул, вун захъасра акъе сара контрольный, зун вас фичира са итте задра гъушанасе диквандіъас. Амма Расул къацІра Джалалан багулихъди гъударкай ада-вуйи, учис ун девеяф суман мин чІалар. КкиркІуная дар-сра, меґелимди гунтІ акъуная шиниккварин тетрадар, аттатуна хъуная танафус. Расул шатти ая танафусдиъ,

Джалал – кІилра кейхьуна, пушмалди. Классин шиник-квари хабар гьушуная Джалалавас:

– Фие, Джалал, акьуф? Фикьас пушмалди аефе вун?

– Фикьасчи ягІав? – пуная Джалала, – зас Расула кумак акьундава контрольный акьас, зун са фера акьундава. Расул идже дустт дава. Зун гис иттетара гьушанасе пуни, амма ги зас фишттира кумак акьундава.

– Вун дарсар дахураф, вун вас гулейтІар аркьай адаркаф, Расул фи э вахъас контрольныйбур аркьаф эв? – пуная мис Януса.

– Зун Расулас ширин задар гьушаси сара, – пуная Джалала.

– Иттетар ирцІанди хьиму контрольный акьас хьасе, я Джалал? Верефттава гьалишттинттар акьас. Гьертти учи хуруна кканде учин дарсар, – пуная мис Рустама.

Гьаме вахтгуне гьучадиная мич Расул учра. Джалалас пуная ми:

– Вас закес кьацІра гиран мева, Джалал. Зас вас генара хайир хьуна э кканди аеф. Вун алучІуна хур ве дарсар, вас идже хьуна кканчин. Вас фи э, иттетаригьас зун вас контрольный аркьа суман эв? Гьал ягІар ухь – зун лишттин савдабуригІ мусра гІаеф дава.





ФатИмат

ФатИмат ппара идже руш хьуная чиппин дар-бабарихъ хъаеф. ФатИматахъ бицИ чура хъай хьуная Ясуф агъаф. Ясуфан хьibu ис дала дава, ФатИматан муя ис хьуная. ФатИмата кумак аркъая бабас бицИ Ясуфахъ хьуттурфас. Баба хулан курар аркъагуна, ФатИмат учин бицИ ччуччухъай эркъвай ве. ХIа ччиччи учин бицИ ччуччус ишкилар йирхIас ягIар аркъая гьер рангунин къа-ламарилди, пласттилинарикес емишар акъас, палочккабу-рилди хIисабар акъас. Шавла хье вахттуни, мебур чиппин гитанихъай дурухIая.

– Агъ, бабан зурба руш, – агъа баба ФатИматас, – ппара кумак кеттархъая вакес зас. Вун лап дарсар ицIан мегIелим суман алучIуная вари шейьер ягIар аркъай хье Ясуфас.

– Зун хIа хьегуна, закес мегIелим хьуна кканди зас, баб, – агъая ФитИмата учин бабас.

– Хъасе, хъасе, бабан, – агъая баба, – зас гьалдимари аргвая фишттин идже мегIелим вейчин вакес, зе руш.

Баба учин тегIрифар акъуф, ФатИматан йиркIв лап шад хьуная. Баба мебур пехIела, ФатИмат хъара ппара иджи хурас алучIая учин дарсар. Учин бицИ ччуччусра ягIар аркъая ми гьал хIерфар.

Фатиматас баба агъая:

– МегІелимдин кар иджеф э, зе руш. МегІелимдиъ ппара Іакъулар хъуна кканде шиниккварис дарсар ицІас хъас.

Дуънъайил але пешабур, лихунар вари лазимттар э инсанарис, амма са карра акъас хъастава иджи дарсар ягІар акъас дакканттаривас. Фи пеша аркъайчира, кІилиъ Іакъул ай кканде инсандин. Учин дадарна бабар рази хъас, учин ватанис хайир гъас кканчин, гьер шиниккв алучІуна кканди ая иджи хурас учин дарсар, мегІелимари петтар акъас.





Сулна гІур

Са дараъ хуная гІурас чаркквар. Іуд са батІар джагвар чарккв, шергве чІичІра алеттар. Гъазе гІулин чІиригІас гІуран чаркквар Іудара Іу джагвар гиргенар суман аргвайи. ГІур, йина учин чарккварис тухъ хъастегъен некра, уч гъишая сасра даради, атуна сатти гъеме бицІи чаркквара. Фикъас эгъан ме гІура миштти аркъаф?

Фикъас пичин, учра, учин чаркквара сула даІуьтІанас. Суларис лап дахи ниъ вереф э гІурахъ чаркквар хьугуна. Ниъихъди-ниъихъди аттива гебури бабра, чаркквара. Миштти идехІела э гІур дахи-дахи гъишаф сасра даради, чарккваригъас вархайилди. БицІи чаркквар гІуран, чиппин баб андавай агуф, гІачучІуна джинуьхъая къалин гъазе чІиригІ, ибурара фачадивуна кафалив.

Адина мич са вахттунилас гІамалчи сул. Ширин ниъар хъуная мис, гІуран чарккваринф суманттар. АлучІуная ме тич улар атай, мич улар атай, ниъар аркъай гІурахъас рукас. Те кІурандихъди вея сул ниъар аркъай, ме кІурандихъди вея, амма са фера фачархъай адава мис. ГІур гъишина, чаркквар джинуьхъуная. Алурцуна-алурцуна гъаме усарил, хъуна шавла, ушуная сул.

Іуьшуйра адина адава гІур учин чарккварин багуьди. ГІурарин неkk ке мая¹ киеф хІисаб аркъая. Іу ягъди неkk

¹ Мая – гІане неkk.

дахъучира, гІуран чарккварис гаш верефттава. Сасра ягъа яваш-яваштти са мугъаттис хъайиная гІур учин чарккварин багуъ. Баб адиф, чаркквар шад хъуна, кичучІая чиппис неkk ухас. ГІурра шатти ая учин чарквар сагъ-саламатис амилгухІела. Мез йирхІая гІура бахилди учин чарккварил. Гъал йина неkkра, гъая гІура учин бицІи чаркквар сасра мукъулди. Мисаъ джин аркъая сулагъас чаркквар. Атуна гъагебура къалин чІиригІ, уч мисаъас хъугулая гІур.

ДарагІ сул адаркая учис Іеле заттихъас, нандиъас ичи вея мис гІуран чарккварин ниъ. Ниъихъди-ниъихъди вея сул чІираригІ муулра гІадаркай, амма чаркквар мисаъ андава. ГІура сасра чІиригІ джин акъуная гебур. Хъял адиная сулас учис чаркквар фачадархъехІела.

Гъамиштти гІура са ягъ гІартай, вей са Іу-хъибугелай дала йина адава учин чарккварис неkk. Хуппай къацІра миндавай гъишиная сасра мукъуйиди. Гъал бицІи чарккварис гъазе чІир ІуътІанас ягІар хъуная, чиппин кІил атти-васе мебури гъал. Гъамиштти аркъа дараригІ гІае джалла гІурари чабра, чиппин чаркквара суларис фачадархъас.

Агъуларин ахттилат ая, фикъас гІура учин чарккварис неkk са-Іу ягъа дала дайирцІанф ичин: ГІура хабар гъушуная учин чарккварифас:

– Чвас хъибу вазди ккандев, – пуная неkk йина зун чвас, яра хъибу я-я-я-я-ягъди?

Чарккваринра хиял хъуная хъибу ягъ ирхи, хъудивуна, пехІела баба, хъибу ягъ хъибу вазалалас ппара эгъан пуна.

– Хъибу ягъди, – пуная чаркквари.

Тегунанхаб хъибу ягъди дала неkk ицІандава гІурари чиппин чарккварис.



Са классинттар

Раисат Рамазановнайи учин гъиликк ккие шиник-кварис пуная:

– Чун джалла са классинттар э, чун гъал са коллектив э, гъал чве арайиъ цӀуьппе хӀуьлмат хьуна кканди ая. Сайи сайис гиранвелар, дакканвелар маркъа. Кумакар акъас, хӀуьлмат акъас яхӀ акъе чве классинттарис.

Раисат Рамазановна ппара идже мегӀелим э, шиник-кварис кканвей вейи ме.

– Хьурай, хьурай, акъасе чин, – пуная шиникквари.

Иджи дарсара хурас алучӀая ме классинттар, иджи чиппин китабара ухӀас, чаб чиппихъдира ппара хӀуьлмат хъай аркъая мебури классин курар.

Сагелай лекус иттар акъуная мебурин классин Тарлан агъа кӀиркӀан. Мактабиди вес девей хьуная мифас, са лек ккишас девей.

– Гъал фикъасе хьин Тарланас? – пуна, хабар гьушуная Раисат Рамазановнайи ме классин шиниккваривас. – Хье Тарлан ппара иджи хура кӀиркӀ э, дарсарихъас хъаттархьучин идже хъасттава гин кар.

– Зун кумак акъасе Тарланас математикайиъас, – пуная Шамила. – Зун ге хъаттархъас атасттава.

– Зун Тарланас английский акъас кумак акъасе, – пуная Заура.

– Зун русский языкиъас кумак акъасе, – пуная Януса.

– Агъ, зурбабур, – агъа мебурис Раисат Рамазановнайи, – ппара идже дусттар хъай аргва зас Тарланахъ.

Гъамиштти, вей хулади, Тарланас кумак аркъай хъуне учин классинттари. Дарсарихъас хъаттархъас атундава ме учин дусттари. Са хӀафттайилас хъайиная Тарлан мактабиди. Джалла дарсариъас хъуная мис идже къиматар. Ппара шад хъуная ме вахтгунни Тарланан дусттар.

Са классин шиникквар гъамиштти хъуна кканеф э сара.





Цул

Адиная кызилдин Цул, фай тIабакIарихъ ахъуна
гьер джураин емишар: хутар, тIибитIар, хIечар,
джихерар.


– Ма, IуьтIен, шиникквар, ма, –
агъай ицIанде Цули шиниккварис
емишар.

Шад хъуна, вея Цулин багу
рушар, кIиркIар. Цули гебурин
удигъ гыхъая емишари ацIу
тIабакIар.

– Гьал мич хъуттурф зун
фиркъай чугас, – агъа Цули,
аттивуна учин кафалихъ хъае
къасуниъас гьер джураин
рангар.

ЧIир – хъюхъе рангунинф
аркъая Цули, завар – харчIе
аркъая, хъеттар – чулле рангунин.

Гьал алдаркая ме дар хъае багухъди. Даради фартая Цули
гьер джураин рангар: гьал кIурарин цIабар хъуне са пай
ире, са пай – хъюхъе, сасра пай – кIуранин-хъюхъе, буре,
чире. Са-сад гъазе цIабара гIами аргвая дарагI – гебурис
Цули ранг йирхIуна адавуи. Даран яIанигIас, цIа суман,
угая марзарин тIирIар. Ире гьибгьер хъучархъуна, гъузу-



ная сифттан аязихъ. Кїлди дунья, кѣзил алатѹф суман,
аргвая ккетѹна хѣухѣ нур.

Фи ухѣтанди аргвая ме вахттуни джилар!

Шад хѣуная Цул, шиниккваривас хабар гѣушуная:

– Гѣал фиштти хѣуне, шиникквар? Бегелмиш хѣунев
чвас зе дар?

– Ппара батІар хѣуне! – агѣая кІиркІари.

– Кѣвадилкѣван ккихѣуф суман хѣуне! – агѣа рушари.

Шиникквари мебур пехІела, хѣара шад вея Цул. Гѣал
йирхІая Цули уѣштт, халак аркѣая нахширар, дахи-дахи
вес куче мукѣарихѣди.

– Мисаѣ ругѣу кулакар хѣасе, угѣалар угѣасе, дахи
ях, дахи ях! – агѣая Цули нахширарис.

Са вусал гунтІ вей, заварилас тич, чукѣвар суман,
йирхІуна хѣйбу муртт, вея нахширар куче мукѣарихѣди.
Вей-вей вархайиди аттархѣая нахширар, яваш хѣуне гѣал
мебурин джилар. Шиникквара аме мисаѣ, гѣава заваритѣ
агѣадаркуна.

– Гѣал фиштти хѣуне? – пуна, хабар гѣуршанде Цули
мебурилас.

– Ушурай, ушурай, – агѣая шиникквари, – мисаѣ нах-
ширарис мекІ хѣасе.

Шад хѣуне Цул, шиникквар рази ай агухІела учил.

Гѣал фачучІая ме кѣрибур гунтІ акѣас заварилди.
Кѣрибур са вусал хѣу суман, музи-музи угѣуне угѣал.

– Гѣал фиштти а? – пуна, хабар гѣушая Цули шини-
ккварифас.

– Угѣал ккандава! Угѣал ккандава! – пуна, гѣук-
кай-гѣуккай гѣишая шиникквар.

Элхѣенди ая Цул, шиниккварин хуппахѣас агѣая:

– Емишар кканде мебурис, угѣалар ккандава кѣацІра!
Уч учил лап разиди ая Цул.



Цулин дар

Муслимаат Мусаевнайи файшуная учин гъиликк ккие шиникквар цулин даради. Сакин багамин вахтт хъуная, ибгIайи цулин рагъра ай хъуная, ширинди-ширинди учин нурар алартай джиларилди. Заварилас тич вей нахширарин хулар аргвая шиниккварис. Муслимаат Мусаевнайи агъа шиниккварис:

– Тагъа гъате нахширар ибгIа мукъарихъди ваяттар э, цул цIуьппе хъастти, мекIер аттархъастти. Тебурилас мисан Iурд алдихъас верефттава, мисаъ Iелеттара фачархъафттава Iурдин вахттуни. Хъе мисариъ амилгванф лап са чIукъ нахширар э. Шиникквар, чвас ягIав нае нахширар ичин мисаъ Iурдин вахттуни эркъваф?

– ХиуринтIай джакъвар, луфар, къерекъелар, – агъая шиникквари.

Са вахттунилас рукъуне мебур дарахъди. Цулин дар агуф, муъхIтал хъуне шиникквар. Фи ухътанди ая Цулин дар! КIилди дар къизилдин нур ккетIуф суман ая, IатIуная, сакинди. Гъер джурайин рангарин цIабари ухътан акъуна ая гъер са кIур.

– Гъал, шиникквар, хъин йирхIасе цулин дар. Аттивуна хIязур акъе чве къаламар, альбомар, – агъа Муслимаат Мусаевнайи. – Фишттинф хъуна аргвая чвес гъеме цулин дар?

Шиникквари батІарди хъуттурфанде дарахъ, хуппай гъертти агъа:

– Цулин дар гъер джурайин рангари ацІуная!

– Даран цІабар рукъуная, кІурар илгунди аргвая, дар Іекви ая.

– Марзарин гъибгъер тІирІарил алгъахъуная, ире маргъар суман аргвая.

Муслимат Мусаевнайис ппара бегелмиш хъуне шиникквари петтар.

– Гъал чун петтар хъин альбомарик йирхІасе, – пуне мегІелимди.

ФачучІуна атая шиникквари цулин дар. Ме ягъа ппара шад хъуне мебурин йиркІвар. Джалла шиникквари рангунин къаламарилди йирхІуне ме цулин батІар дар. Атаяф са дар ичира, амма са шиникквдин ишkil сасра шиникквдин ишkilис ухшарди адава. Гъер са шиникквди учис фиштти аргвайчин дар, гъегиштти э йирхІунаеф. Сайин ишkilигІ ппара хъюхъе рангар гІая, сасрайинттигІ – буреттар, сасрайи учин ишkil иреттина кІуранин-хъюхъе рангарилди йирхІуная. Марзар йирхІуная мебури ири-ири, гІикІуна даран гъар мукъаригІ, угае цІабур суман.

ЯгІа Муслимат Мусаевнайи ишkilар йирхІубаъас алийиная джалла шиниккварис гІифудар. Ме шиниккварин ишkilарик дар, са джан алде щейъ суман, аттархъуная.

Гъер са шиникквдин цулин даран ишkil учин джурайилди батІарди ая.



КьутІурар



Саниятан баба ягІа абкьанттарис аркья кьутІурар.
Санията, гьучадина, бабавас хабар гьушая:

– Я, баб, фиттин кьутІурар э вун аркьяф?

– Яккунттар, нисинттар, меджеринттар, зе руш, –
агья баба.

– Зунра кумак акьасе вас. – агья Санията.

– Хьурай, бабан, хьурай, акье, амма сифтта ве гьилар
батІарди Іуьччан, – агья баба учин рушас.

Іуьччуна гьилара, кІилра итІуна ягълукьи, гьитІуна
удигь мухуригьанна, фачучІая Саният кумак акьас учин
бабас.

Баба тегІди- тегІди алттирхІая гІурин кІилар, Санията икІая джарариъ яккар, нисар, межер.

– Агъ, зе зурба руш, – агъая баба, – фидегъен иджи кумак аркъая вун зас.

Гъал усттулил хъуная къутІурарин са цІуд. Абкъанин вахттра э гъал. Гъаме сеІети хулади ачаве Саниятан дадра, ададра.

– Фи ширин ІуьтІаттарин ниъар ая хъе хулаъ! – агъа дада.

– Шаб, шаб усттулихъди, – агъа Саниятан баба, – ягІа ппара кумак акъуне зас зе руша къутІурар акъас.

Гъайишина диванилас хІададра, хІабабра адине усттулихъди, дадра, ададра адине, Саниятан бицІи чура, Кулбан агъаф. Экъуна усттулихъ джаллабури ІуьтІая мебури къутІурар, тегІрифара акъай:

– Агъ, фи ширинттар хъуна ая ме къутІурар!

– Ппара иджеттар хъуная!

– Чин мишттинттар къацІра ІуьтІуфттава!

Саниятан дада учин рушахъди хуттурфуна агъая:

– Зас ягІа фикъас ичин ме къутІурар мидегъен ширин хъуна аеф: зе руша акъуттар идехІела.

Усттулихъ хъаеттар вари элхъенде. Саниятасра керхъуная элхъ.

– Баркаллагъ, баркаллагъ, че рушас, – агъая хІада- дана, хІабаба, – гъеле бицІи гъилар сагъ акъурай ве, иркІв сагъ акъурай ве!

Шад хъуна, сив ибурарихъди дегъен ушуне Саниятан, улари рекІвер ицІанди ая рушан, иркІв тегІди ишай.

Гъал Саниятан йиркІураъ архъая хиял – гъемишанди кумакар акъас бабас, ги Іелеттар аркъагуна.



Джакъварихъас

Че хал Іу мартабинф э. Чин экъуна аеф вартти мартабиъ э. Ади хулар чин ппара дархъаф гІулана э, че хулади гІалашувар адегуна шагъурариъас.

Багаймикестти дахи сифттан рагъун нуларив фай че баба дархъа вартти хуларин тІагарар. Ккегъдивуна халла, че баба багаминттар хІезур аркъа. Че хал алеф гъава кІунтІал э.

Са-са гелай че хулади тІагарариъас ачархъая джакъвар. Адаркуна хулаъра, дахъунае тІагарариъас хабра аттве мебур. Баба час ахттигъар ицІандава кирхІас джакъварик. Ги час гьер гелай агъайве:

– Джакъв ачархъегуна хъе хулади, чун чвас дагу тІул аркъай акъе. Унар аркъай маркъа, гъараяр аркъай гъургъай маркъа, дахъичин гебурис гучІ верефе, чаб фарцанди аяф суман верефе.

Час че баб ппара кканеф э, чин че бабас ппара хІуълмат аркъа, бабал иджи хъеб алихъайра ве. Гъамиштти идехІела, чин къацІра джакъварик кирхІай вейдава.

Са-са гелай че хуларихъди гунтІ вей ве ацІуна джакъвар. Гебурис ппара кканвея че шифердилас аладинае хъед ухас бочккаийъас. Хъйбу-якъуд хъай вей гебур че бочккаийин къирагъилди чиппис хъед ухас. ГІулин куче

ягъари джакъвар гІучІайра ве чин бочккаийъ агъацІунае хъеттигІ. Сифтта сад адина, учин хиларилас хъедра ала-туна, хаб вея. Хуппай Іуд, хьибуд ве чиппис хъеттар ухас, бочккаийъ ае хъеттигІ гІучас.

КъацІра гучІ гъадава джакъварис че хуланттаригъас. Фикъас пичин, чин сакинди эркъвахІела, гебур фацанас алдучІахІела.

Пулана че хулаъ ае гІалашуварис тамаша вея че джакъварил. Гебурин хиял ве чин къасустти ухІаттар суман ме джакъвар.

Дузди пичин, час хІакъданди кканди ая атас че хулахъ ме джакъвар. Мебурихъ хъулангуна, че йиркІвар шад вея. Багамикестти дахи час батІар мегІнибур аркъая ме джакъ-вари. Сара че багъдиъ милехъвар хъас артайдава мебури, час хайир кеттархъая ме джакъварикес.

Іурдана джакъварис четин ве Іелеф джикІес. Чин мебурис къур ккерхъая, гуниварин къурцар ирцІанде. Ге вахттуни хъед авейдава че бочккаийъ, чин са къабуъ агъа-туна хъед че раkkal хІаятиъ артай ве. МекІил, аяз кие Іурдин Іуьшари, джакъвар гІучІа че мухІуйтъ ае рукъу ІуькІеригІ. Ме ІуькІеригІ мебурис къацІра мекк вереф-ттава. Мисаъ джакъвар ширинди гъархъая, эмкІерикес куче гІулара аргвай.





Камилайин мудураp

Камилайин баба ухІай хуная хулахъ цІегьер. Гъар хъидана вей хуная ме цІегьерихъ бицІи мудураp. Вари цІегьер джагварттар хуная, амма сад гебуригІас кІареф хуная. Ме кІаре цІегьелал ппара гІешкъ алгъушуная Камилайин. КІаре цІегъ ппара дурхІас кканеф хуная. Камила агуфна сад, цІегъ Іу лекулди гъурзанди хуная, кІилра ттурттанди. Камила учигъди гъучадегъилди, цІегъ кегъишай хуная микди, дурхІас кканди. Ме цІегьерис хе мудураpа чиппин бабарис ухшардеттар хуная. Джагварттарис – джагвар мудураp хуная, кІаре цІегьелас – кІареф. КІаре мудурин чІичІ лап нур ицІаф и, улар хъюхъеттар, абанкъундил але чІарар бурматтар. Джагвар мудураpин арайигІ кІаре мудур лап ухътанди аргва. Камилайин ппара гІешкъ алде гъал ме кІаре мудурилра, мин бабал суман. Учин гъилихъ вардиш акъуная Камилайи ме кІаре мудур, фи-хунаpа итте задар ицІанди. Мудураp са дахи хІа вереттар э. Хехаб са вазалалас баба адартай ве мудураp хъидин куче рагъуккди. Алихъуна мегІра, чаб чиппихъай ппара дурхІай аве мебур ме вахттуни. Камилаийна баба мудураpис хъедра ккиланде, гъазе ІуькІера ккерхъа.

– Са бицІи гъузен, – агъая Камилайи учин мудураpис, – са чукъ гагъдилас адикасе чун гъазе чІириди.



КъарнатІай

Хъай хъуная Калимат агъа русахъ пелелан са чарккв. Ме пелелан чарккв чиппин абаба йинаеф э Калиматас. Ме руша учин чаркквул алихъуная КъарнатІай агъа ттур. КъарнатІай бицІи аме мехІелди, ахъихъуная Калиматахъ вея ме найич хъучира. Рушан гъилиъас муул атай фи хъичира Іелдира э ме чарккву. Гъал Калимат учин баб суман вея ми чаркквус.

Гъемиштти, вей-вей, хІа хъуная ме чарккв. ХІа хъуна, хъуная ме бицІи чаркквалакес са батІар пел. Ппара ухътан пел хъуная ме, рангунин мурцІара гІай, гугул ире бицІи бад-бадра алди. Калимат шатти ая, учихъ пел хъухІела.



БатІарди ахъаджихІа ме учин пелеллахъ. Гъар багамикестти къурккерхъа Калимата учин пелелас, хъедра ккигъарта.

Са ягъарикес са ягъа аттвей адава КъарнатІай къурчаъас.

– Я, баб, найич хъуне зе КъарнатІай? Фикъас эгъан ме ягІа аттдайиф? – пуна, учин бабавас хабар гъушая руша.

– Гьал хуттурфасе хьин бабан, – агъая баба.

Чиппин кьурчаъра, салаъра руцая мебур пелеллахъас. Гьурил ме алдавуьйи, салаъ адавуьйи. Гьал нанхъуне ме пел?

– Я, баб, гулунигъан зе КъарнатІай? Адина Іуьшуй сула файшуф эгъан зе пел? – пуна, уларихъди негъвар ахъадине Калиматан.

– КъарнатІай! КъарнатІай! Нахъи вун?

ІуькІер ае мурттуъас шух-рухар унихъай ая мебурис, хуппай КъарнатІин джилра вея:

– КьутІ – кьутІ – кьутІ-кьутІ.

Шад хъуне Калимат, ІуькІеригІ учин пел агуф, амма баба кирхІас артай адавуьйи пелелак.

– Ате, ате, сакинди экъурай сагелай. Хабди уч аттесе. Ле рукъу ІуькІеригІ КъарнатІи учис муг аркъаеф э, зе руш, – агъа баба Калиматас.

Са вахттунилас аттине КъарнатІай салаъас, са гъавайи-лас къа-къара атай. КІилра гъадивуна аруцая пел, гъарайра алихъуна.

– Гьал шаб гъала, Калимат, – агъая баба, – хьин хуттурфас КъарнатІин мугуйихъ.

Ушуна хьуттурфугуна, агуне Калиматас ІуькІеригІ алурцу муг, мугуйиъ аргвая са джагвар гъурагъалра. Калиматан сив ибурарихъди ушуне.

– Зе КъарнатІи гъурагъал акъуная! – агъа Калимата.

– Гьал гъемишанди, гъар ягъа аркъай акъасе вас гъурагъалар ве КъарнатІи, – пуная баба. – Лап идже хъуне! Лап идже хъуне!

– Лап идже хъуне! – пуная Калиматара.



Зе баб

Багаймикестти, улар дахъастти, сасра хулан ІачІа-ригІас кѣабарин бицІи унар вея зас. Ге зе баб э, шиникквар кетІас гучІай, ява-яваштти хулан хизанарис багаминттар хІезур аркѣаеф. Че хуланттар гѣархѣуна аме чиппин ибгІа ахунарикк, са баб э дахи гѣайишина аеф. Зун муьхІтал вей а зе бабал, фиштти ичин гѣеге хѣу-чархѣаеф Іелеттара акѣас, мерттвелара акѣас, учин кар-дилра вахттуни вес.

Зе бабан гѣиларигІ кар уч-училас эл-беъэл ккиркІва, фиштти ичира са дахи. Зун алучІучин акѣас баба аркѣа кар, зе ацІуна гагъ ве, фишттира ккидиркІвай гѣеге кар. Зе бабан гѣилар кѣизилдинттар э, йиркІуранра са гІудулфе зе баб, улара шадвелди ацІуттар, гѣургѣа чІалара ширин-ттар.

Зе баб че хулал але чирагъ суманф э. Че хулан хизана-рин арайиъ нухІуьбат аеф, че хулаъ баракат аеф, чахъ че баб хѣаехІела э.

Час ппара багѣа э че баб!



Зе мегІелим

Зе мегІелимдин ттур э Карина Магомедовна. Засра, Зе классин шиниккварисра ппара ккан че мегІелим. Карина Магомедовна сифтта классиъ ачадегуна, батІарди хуттурфанфе вари шиниккварин хъюссубурихъ: фиштти айчугас че гъава. Хуппай хъуттурфанфе че классихъ, че партабурихъна, доскаийхъ.

– Иджи гъзузив, Карина Магомедовна! – агъая классиъ аедегъен шиникквари.

– Идже мурадар йирай чвас! – агъа час че мегІелимди.

Карина Магомедовна гъар са шиникквдил мугъатти аве, гъар шиникквдис дарс иджи ягІар хъуна айчугас. Че классикес сайис дехІера четин вей агучин дарс ягІар акъас, че мегІелим эркъвая гъеге шиникквдихъай мактабиъ дарсар ккиркІухабра.

Карина Магомедовнайи час агъайве:

– Удигъай ушу дарс ягІар дахъичин, хабди вереттара ягІар хъасттава.

Че мегІелим шад хъас, чин ппара алучІай ве дарсар батІарди хурас. Карина Магомедовнайи час агъа:

– Агъ, фи зурбабур э чун! Баркаллагъ, баркаллагъ чвас, ягІа чве бабар-дадар шад акъе чве къиматар агвар акъуна.

Карина Магомедовайихъай экскурсибуридира вейве, хІурин Іуссеттарилдира ве кумакар акъас. Ппара хІуълмат ая хІуриъ че мегІелимдис.



Кумакчи

Къулбан бицІи аме, ге мактабиди ушуна адава мехІелдис. Къулбанан хъйбу ис дала хъуна адава. Нурият хІаф э Къулбаналас гІифу исанди. Нурият мактабидира вея, хулан курара аркъа. Учин бицІи чу ппара кканди ая Нуриятас. Фацуна Къулбанан гъилра, вея Нурият паркуниди.

– КІиркІалас ул алдимихъа, гъа, – агъа баба, – гъеле мехІелди бицІи аме.

– Хъурай, хъурай, баб, – агъа Нурията.

Паркуниъ Нурията агвар аркъа Къулбанас ирхе кІурар, гъер джуърайин батІар тукар, чуькІер, къваницаяр. Ме сеІети ме паркуниъ ппара шиникквар ая. Гъаме шиниккварихъай дурухІая Нуриятна Къулбан.

Сад пуна алирхІуна, кичатІуна¹ Іешая Къулбан. Нурията тегІди гъадивуна джилилас, буІас аркъая учин бицІи чу.

– МеІеша, зе чу, меІеша, – агъа Нурията, – кІиркІар Іешафттава, рушари Іейибар аркъафе. Вун бицІи идеми э гъа, зе чу! Идемар Іешафттава гъа!

Нурията мишттинттар пехІела, Къулбан буІа. Шад хъуне ме учис бицІи идеми пехІела ччиччи.

¹ КичатІуна – гъучирхІуна.

Хулади адегуна мебур, бабас аргвая Къулбанан бер-
хІемик кие са кІучІ киндавай.

– Гъала, зе кІиркІ, – агъа баба, – тин ле берхІем мич,
зун ве гъелик кІучІ кикІасе.

– Зун кикІасе Къулбанан кІучІ, – агъа Нурията, – засра
ягІа кеттархъунае кІучІар кикІас.

– Агъ, бабан кумакчи руш! – агъа баба. – Фи кар ар-
къайчира, вун зас кумак э!

Гъилар сагъ хъурай ве, зе руш!





Ккабашккаларис

Завал хьуна са ягъа, гадабури акъуная маслихІат сувади вес гъибгъер акъас. Хьуна багаймикестти савусал гунтІ, чиппи пегъилди, вея мебур суваъди. Суван укунихъ алчархъа ме шиниккварис хІуппахъан, учин хІуппарин кІаратІра ухІай суварихъ экъунаеф. Ме хІуппахъанди ягІар акъуне шиниккварис найисаъ ичин ппара ккабашккалар аеф.

– Баркалагъ, баркалагъ, Къази-адад, – агъа шиникквари ме хІуппахъандис.

– Ях, ададан, ях, джанар сагъ хьурай чве, – пуная Къази-адада, – ппара ккабашккалар завал акъе.

Яваш-яваштти кегъвея гадабур сувакди. Суван гъванкІар багук ппара ккабашккалар кея пуне мебури хІуппахъанди. Рекъ адава сувади ппара четине агъавес, гъиларив бидонар, Іеле задара фай.

Рукъуная мебур ккабашккаларихъди, завал акъас фачучІуная гъарф учин бидониди. Вартт вередегъен хъара ппара аргвая гебур шиниккварис. Ире ккабашккалар са ухътанди аргвая сувак, адитъас вартт хуттурфугуна, гъеме суварихъ Іуъшуй ккабашккаларин угъал угъуф суман аргва. Шад хъуне кІиркІар мидегъен ппара ай агуф. Муса сасра шиниккварилас хъибу исанди хІаф э, мис иджи ягІа ме сувар.

– Чун ппара мугъатти ухъ гъунакес ахтт кедархъас, мисаъ дагъарара ая гъа, суварин чІирра шергвефе, мисаъ къачар э аеф, лекар алачІурха. Чве бидонара цІуппи фацен гъили, фаттадархъагъилди. Эгера фаттархъучин, бидонар адавесе гъаге нецІухъди дегъен, ккабашккалара сад мин-давай далгъванасе.

– Хъурай, хъурай, дустт, чин эхІттиятти хъасе, – агъа шиникквари.

Ккабашккалар аркъай, вей-вей хъара вартт вея кІир-кІар. Гъал мебури хубджи завал акъуная ккабашккалар, са чІукъ э амеф бидонар ацІас. Аркъай ахттилатара, агъархъая мебур суван кІилилди. Бидонара ацІуная мебурин. Суван кІукІул шиникквар эркъва шавлавелар ккетас, чиппис гунира ІуьтІанас. Чиппи файдеттар, аттивай, алихъая мебури ІуьтІас.

– Фи иджи ая гъамисаъ! – агъа Рамазана. – Фикъасе хъин хуларий экъуна эркъваф, гъамишттин батІар суварий ададаркай?

– Ппара ухъттанди ая! – агъа Раджаба, – Хъе кІенакк кІилди дуьнья ккея: нецІвар, чІирар, дарар. Тагъа лиІра хъе багулив фай алттвея. Зас зун гъате лиІ суман аргва ме гъава суван кІукІулас.

– Вей акъасе, сара, сувариди, – агъа Мурада. – Зун хІязур э вес.

ХІакъданди, ппара батІарди ая хъе сувар ме гІулин вахттунни. Гъазе махпшур дивуттар суман ая джилар, сувар, чулли-чулли ая завар, са къирира, са нандира алдава. Суварин къате нецІвар ая, алихъуна хух, тегІди ай вес хІуьларихъди. Гъава суварин дагъарарин кканчарил суван къунар алдея, гъузуна, ахтт хъуттурфанди инсанарихъ.

– Суван кьунар эв гьатебур? – пуна, хабар гьушая Зубаира Мусайифас.

– Э, кьунар э. Инсанари кирхІуна ккандава тебурик. Лап са чІукь э тебур амеф, гьер исалас иса гуланди ая суваригьас, – агьа Мусайи.

– Тебур Ире китабиъ аеттар э, – агьа Навруза.

– Гьал, зе дусттар, – агьа Мусайи, – ккабашккалар хьин акьуне, шавлавелар ккейшуне, гуни хьин ІуьтІуне, гьал хьин яваш-яваштти хьутІушасе хулариди вес. Гьал хаб вере вахтт э амеф, дахьучин мучІе хьасе хІуриди рукьагунас. ЭхІттиятти алаях, лекар дачІурхас.

Гьал вари хьай алавея мебур сувалас ахтт, фай гьиларив чиппин ацІу бидонара. Вартт дала, ахтт вес хьара четин суваригь. Муслим джаллабурилас бицІиф э мебуригІас, ме садпе гелай э ме сувариди адинаеф. Сад пуна ккеттархьуна лекар, алирхІуне Муслим, фаттархьуна гьиларивас мин бидон, адайшуне ахтт, дуз гьете нецІухъди рукьуна. Муслимас керхьуне Іешал – кІилин ягъди диву загьмат хьуссуна ушуне мин. Ккабашккалар далгьуна, бат хьуне мин. Мусайи дахи-дахи, гьил фацуна, гьадива Муслим.

– Яваш-яваш, Муслим, – агьа Мусайи, – меІеша, хьин ле кар дуз хьакьасе, кьацІра пушмал мева вун, зе дустт.

НецІухъди рукьугуна, дусттари чиппин бидонариъ ае ккабашккаларикес йиная Муслимас. Гьал Муслиман бидонра гьибгьери ацІуне. Шад хьуне Муслим.

– Баркаллагь, зе дусттар, чвас, – агьа Муслима, – гьал зас иджи ягІар хьуне фидегьен цІуппе илдешар хьайчин захъ.

Шатти-шатти алавея сувалас чиппин хІуриди ери кІиркІ, ери цІуппе дустт, ери цІуппе кьардаш.



Ѓуни

Зайнаб абаб адиная багамикестти дахи хуппу-рилди. Мисаъ вари инсанари узуная чиппис сулен кьурар, джархар, картуфар. Зайнаб абаб адинаеф э чиппин сулен кьур хъачархъуна айчугас. АлаттатЃуна сумалалас са кЃетЃ, тЃишина гапаригЃ, адахъас аркья ми кЃетЃалаъас кьваран ударар. Ттузар уф акьуна алдахъуная ми, ударар учин сивий агъахъуная. Адина хаб хулади, хизанарис пуная:

– Хье сулен кьур хъучархъуная, ударар цЃуппе хъуная, кьана дакьуна ушуна вес ихъениъ¹. Кулак аттархъичин, хье кьур джилиди алахъасе.

Дадра, бабра, Ѓудара рушара, Селемна Саибат, Кьулбан агъа кЃиркЃра хъай ушуне мебур ихъен акъас. ЧЃиникЃер, маккалара фая мебузив, хъедра, Ѓелеттара.



¹ Ихъен – хуппур уца вахтт, гЃуликк ушу вахтт.

Ая агъай сулен къуран ацІу кІетар, аладаркуна джилхъ хъуттурфанди. Сифтта Зайнаб абаба кирхІуная ихъеник гъил, дахи алттушурай пуна. Хуппай рушар фачучІуная уцас, фай чиппин чІиникІера. Рукъу сумар тегІдигтегІди уцай, алиртІанди хъелар, сад сайив афиланди акъуная жвалар (хъилар). Дадана, Къулбана жвалар иртІанди, жваларикес руджар аркъая. КІилин ягъди лихуна, ккиркІуне мебури уцуна сумар.

– Ппара шавла хъуне хъин ягІа, – агъа дада, – гъал весе хулади, Іу ягъалас дала уъркер¹ акъас хъасттава – марквар рукъуна кканде.

Цулин рийи рагъари гъил-гъилари рукъас акъуне жвалар. Адина ме хизанари ккегъидивуна жвалар, акъуне уъркер. Гъал удигъай суьлен къур аледегъен манзилил бицІи кумабурис ухшар уъркер хъуне.

– Уъркериъ къур иджи рукъаси, – агъа баба, – ширинди шавгъара гІаруцай.

Къулбан рушарилас бицІиф э. Ти уъркелахъ хъучихъай, ми уъркелахъ хъучихъай учІай, джинихъуная. Саибата аттивая. Селем мебурилас хІаф э, ме гъузуная дадар-бабарихъай. Мебури маслихІат аркъая, мус ичин къур алайхІаф.

Къур алайхІа ягъа, фай палаткабура, кІетІабура, хІа-лара вея ме хизанар хуппурилди. Чиппис кумак акъас къуншибурра гъа чиппихъай. Къур алайхІуб ппара четин кар э. Миштти идехІела, авала кумакис инсанар завал аркъафи, мил акъуна.

Шиникквари жвалар хъучагъая, хумбари жвалар алирхІай къур алайхІая, идемари алархІу жваларикес

¹ Уъркер – марквар.

марккв аркъая. Кар гІазабинф ийчира, джаллайи хъай аркъаяхІела илгундди вея, тегІди арайил хъуне. Суван хІурариъ инсанари сад сайис ппара кумак аркъай вея.

Къурра алайхІуне, марквра акъуни. Гъал къур тузаривас гъадатуна мертт аркъая мебури. Идемари кІетІабурилди къур гъайихъая, хумбари хъиригери тІузар алттджикая къваран ударарилас, мертт аркъая. Мертт акъу къур чувалариъ, шишалариъ архъая.

– Баркаллагъ чвас варис, – агъая дада, – ппара батІарди кумак акъуне.

– Баракат кие махІсул хъурай!

– Джан сагъди, йиркІв шатти гІутІаф хъурай! – агъая мил акъас аде къуншибири.

Ми къваракес гуни хъас, сифтта ме хъеттилди мертти Іуъччуна кканди ая. Хуппай рукъас рагъаригъ гъахъуна кканди ая. Рукъухаб, тІабакІарилди мертт акъуна кканди ая къур чІирхІаривас, сасра ІуькІерин тумаривас. РагІу файшуна, ругІуна кканди ая гІур акъас. Гъеми гІурикес ширин гуни хъас, гІур тІишина, хъуракк уджунара кканди ая.

Инсанари ппара загъмат алихъуна э гуни гъареф хъе суфрайилди. Миштти идехІела, гунин къадри хъуна кканди ая бицІиттарисра, хІаттарисра.





Двалдин дурухІалар

Удигъ заманабири шиникквари аркъаф сасра дурухІалар и. Шиникквари бяхІсар аркъайи гуджлувелдин, тегІдевелдин, улин хІуьттевелдин. Мебури, хъуна са усал, сад сайи аккиланттар аркъайи, фуш гуджлу вейчугас. Суван кІилилди гъуккай агъавейи, фуш тегІди вейчугас. Радж акъуна атунае азман гъванарис бицІи къуттарилди атайи, фуш хІуьтте улар аеф ичугас. Лекарилди чІилемпай¹ кегъихъай эркъвайи, найифас ппара вейчугас.



Амма джалла шиниккварис ке ппара кканеф и гишттана рес дурхІас. Мисаъ мебури, файдина са азман гъван, алихъаефи са хъудуьхъуь мукъуйил. Гъаге гъвандихъ гъзуна, са кІиркІа ресалалди йир-

хІуна гиштта фартафи учивас вередегъен вархалди. Сасра кІиркІа гиштта фацуна, хаб фататуна кканде, азман гъвандис киркъвагъилди. Рес фае кІиркІа гъван ухІуна

¹ ЧІилемпай – Іашу ругра хъай артІа чІирин къурц, лямкка суман гъайхъай дурхІас.

кканди гишттайигъас. Гишттана рес дурухІас вейи ацІуна шиникваривас Іу пай хъуна.

Те вахттуни рушарихъра чиппин дурухІалар хъаефи. Мебурис кканвейи тІумбучаяр акъас, цинкІи-ликІер акъас. ТІумбучаяр – Іабасибур суман гирген бицІи гъванар и, гъер руша учис аркъа къуттарикес. Са усал экъуна джалла, яІа-нил алийина тІумбучаяра дурхІаефи рушар. ТІумбучаяр мебури гъайхъайи вартт са гъили, сасра гъилин цІатту-риккес тич ккедихъуна ккан вейи. Ккулин шибер ккеди-кайи зирингари.

ЦинкІи-ликІера акъас ппара кканве рушарис. Джи-лик йирхІуна чал, гъаге чалдуъас тич са лекулди хъикаф и бицІи гъван хатІул алчадархъа гъилди.

Амма гъар заманайи рушарис ке ппара кканеф будая-рихъай дурхІас э, хула-хулияр¹ акъас!



¹ *Хула-хулияр* – шиберин дурухІалар: хулар, хизанар суман дур-хІас.



Іу кѣунши

Іу кѣунши ай хѣуная са суван хІуриѣ. Хулара багулив э Мебурин фает, багѣара, бусттанара. Са кѣунши девлетар кканефи ппара, са инсандихѣайра дагѣургѣаф сайира учин хулан раkk дадархѣаф. Сасра кѣунши девлетарихѣ хѣихѣуф дава, инсанар, мукѣунттар кканеф э, мин хулаѣас инсанара кам вейдава. Девлетар ккане кѣунши бурк акѣуф э, инсанар учивас вархал аркѣаф э. Сасра кѣунши учин хулаѣ алтухѣ лама задар адайѣира, инсанарис учин раkkар дархѣаф. Учин девлетар ппара акѣас алучІая са кѣунши. Учин шиникквара уч суман цІуппи вардиш аркѣая ми, сайисра я кумаkra даркѣай, я идже чІалла дагѣай. Сасрайи учин шиникквар йиркІв ачухѣди вардиш аркѣая, бицІиттарис гиран даркѣай, хІаттарис хІуълмат аркѣай. Мебурин хулаѣас гѣемишанди шиниккварин элхѣерин унар аве.

Гѣамиштти алттвея вахттар, гагѣар. Я девлетар кканеттин девлетра ппара вей адава, я ме девлетарихѣ ахѣидихѣу кѣуншин халра Іар вей адава. Ме идже инсан и: ме кѣунши кумаk аркѣайи ятумарис, ашкІинарис, Іуссеттарис. Учин гѣилихѣ хѣае фи-хѣучира ицІанде ми гІаджизарисна касибарис.

Девлетар ппара ккане кѣунши сасра кѣуншис агѣа:

– Я кѣунши, уп, гѣала, вун зас, нандиѣас вей а ве хулаѣ баракат? Ацѣуна инсанара вейве ве хулади, ве хал-хизанра ая, вун сасра инсанарисра ицѣанди ая щейѣер, амма ве хулаѣас са фера кам вей адава.

Ме кѣунши агѣа:

– Ме баракатин, ризкѣунин хѣаф зун дава. Зун фиде-гѣен инсанарис ицѣанчин, гѣегидегѣен ппара вея захѣ баракат.

Зе кѣисмат киеф дала хѣасттава завас фаѣанас.





Сифтта ибхъ

Багаймикестти улар дахъастти Шамилас кІилди дуьньяйин ун атІуф суман хъуная. Са цилик кие сеІетин ун дала адавуи мис унихъаф. Хулаъра фушра адаваф суман хъуне мис. «Баб маларилди ушунаеф хъасе, – пуна, фикир аркъая Шамила, – гъала, зун са бицІиди сара гъархъасе». Гъал, улара алчакъуна, гъархъас алучІая ме, лехІефра алчадивуна учин кІилин гугулди рукъуна. Амма фишттира ахун алчавей андава Шамилас.

Кканве кІиркІас учин багуди гитан гъас.

– Мурка, Мурка, пис-пис-пис, – аркъай, айчугая Шамила гитан.

Гитан гъархъуная, джагвар къаргил, дакканди суман, кІил гъадивая ми фи ичугас Шамилас кканеф учикес. Шамил тегІди алайчІуна диванилас, вея гитанихъди. ТІагарис ул йирхІуф, агуне Шамилас джагвар ибхъин цІиреквар угъай джиларилди. Багъ атІуна илгванде Шамил уч але мукъуйил. Октябрьдин ахир дала дава, амма садпе ибхъ магъа адина, раккахъ хъая.

Гъал тІагарихъди хъучадине Шамил. Джагвар тІутІар суман, ацІуна ая хІеят ибхъин цІепелари. КІилди завар ибхъин цІиреквар хъуна джиларилди алархъаф суман вея. Джилилди рукъу суман, уьцІай вея ибхъ, хъед хъуна. Джи-

лар Іашуна кІари аргвая, пушмалди. Ме сифтта ибхъ – завари джиларис гъатунае хабар суман ая, яваш-яваштти веяф Іурдихъас.

Гъаме вахттуни дадра, бабра ачадине хулади.

– Гъал ккиркІуни цулин ибгІа ягъар, – агъая баба, – мекІер фатІастти картуфар кеттивуна ккиркІуна кканде.

– Сифттан ибхъин хъед ушуна ппара ширин хъасе хъе картуфар, – агъа дада.

Дадна баб гъургъа дегъен гагъди, Шамил, аликІуна учин кунара, аттушуне раккагъди. Завариди агъадарка ме кІиркІ, амма чулле завар къацІра аргвай адава. КІилди дунья фацуная дифари, ягъ эмси ая. Джагвар ибхъин цІепелар, джагвар пеІерин къугъ суман, завариъас ахтт адархъаяф. Яваш-яваштти адархъай завариъас алеркъ-вая цІиреквар Шамилан хъуьссуйил, гъиларил, кунарил. ИбгІа гъиларил эл-беъэл уьцІуна хъед вея ибхъин цІепелар. Шамила фарцанди цІепелар, дурухІая мебурихъай.

– Шаб, зе кІиркІ, гъал хъин багаминттар акъасе, – агъай, ун архъая баба Шамилас хулади.

Шатти-шатти вея Шамил хулади.





Гитан

Сайранатахъ ппара батIар гитан хъая. Уч джагварф, утунил буре тIамтIам алеф, улар гъазе рангунинттар, суьппелар – кIареттар. Ме гитанин рудж джагварттарна буре хатIар алеф э. Сайранатан гитанин ттур э Писанай.

Рушас ппара кканди ая учин гитан, са фера язукъди адава мис учин гитанис ицIас. Ппара иджи ахъаджихIая ме учин гитанихъас. Гагъ некк ккигъартая ми Писанис, гагъ якк ккихъая, гагъ балутъ ицIая, гагъ кIум. Ппара рази ая гитан ме рушал.

Писанай дурхIая Сайранатахъай. Руш учихъай гъургъуф, Писанай Iу улра икIуна, хъуттурфанди рушан хъуьссуйихъ. Хуппай атай хурр-мурра, адина кеттирхIа рушан лекукес, уч гъушуна кканди гъиларилди. Сайраната гъушая гитан гъили, гитани мез фагъирхIая рушан хъуьссуйифас. Элхъ керхъая Сайранатас.

– Фи э вас кканди аеф, зе гитан? – агъа Сайраната гитанис.

Писанай буIуна эркъва, амма уч рушан уларихъ хъуттурфанде. Сайранатас ме гитан учин гъавурди архъаф суман вея. Учин гъил алагъая Сайраната гитанилас, гитани рушан гъил ширин хъуна, хурр-мурр алихъая. Гъа-миштти чиппис чаб ппара кканди ая мебурис.

Сагелай адиная Писанай хулади, фай сивигI фацунае
Iулра. Писани учи Iулар мусра IуьтIафттава.

– Найич файдефе вун гьале Iул хулади? – пуна, хабар
гьушуне гитанивас Сайраната.

– Гьал Iул учин гьунарар хьес агвар акьас файдинаеф
э хье гитани, – агьа баба Сайранатас.

Гьемиштти учи деIелчира, Писани фарцанди гьа
хулади Iулар. Учи фацу Iуларихъай сифтта батIарди дурхIа
гитан, хуппай уч шавла хье вегIдайи, атуна гьаге Iулра, уч
сасра мукьуйиьди ве.

Писанис джакьвара ккан вея. Джинди, яваш- яваштти,
фун чIирхIай, фун чIирхIай вея ме джакьвар але мукьуй-
илди. Амма джакьварис дахи уягь вея гитаникес, дахи-
дахи гьишая мебур гитанигьас, чаб фацас гучIай.

Писанай са-са гелай сасра гитанарихъдира ве. Са-са-
гелай уч училди куьчабуриь адаркайра ве гитан. GIулана
Iушуй кьацIра хулади гIаттвейдава Писанай, архьуная
раккаригь. Шатти ай, уч учил бахилди фартая гитани учин
Iуьммур.

Амма са душман хъая михъ. Фуш э пичин – кьуншин
са кIаре тулла. Писанай агуфна сад – хьиланди, алурхIай
аве тулла, адишай синджилигьас, Писанай чIуркьас кканди
ая ме кIаре туллайис. Писанис кьацIра ме тулла кканвей-
дава, гьавурдиь архъай адава гитан, фикьас ичин кьунши
ме тулла ухIаяф. АлухIучира туллайивас са фера акьас вей
адава гитанис. Ме кIаре тулла гьамишанди цIуппе син-
джилиь итIунаеф э, аттадартай. Ме кардил ппара рази э
Писанай.



Чияр

Са бабахъ хъай хъуная хъибу руш. Рушар сад сайис
Ухшарардеттар хъуная. Чиппин бабас кумакар
акъас кканеттар хъуная мебур, дарсара иджи хураттар.
БицИттарис гиран даркъаттар, хІаттарис хІуълмат акъас
алучІаттар, багунф-кІилинф ягІаттар хъуная мебур.

– Зун кардил ушуна кканди ая, – пуная баба учин
рушарис, – чун мактабиъас адегуна, сайи гІур тІишен, сайи
хІуяг али, яккара гІихъуна, сасрайи каламарин салат акъе.

– Хъурай, баб, хъурай, – пуная рушари, – чин джалла
курар акъасе.

Мактабиъас адифна сад, фачучІуная рушар акъас чи-
ппис баба петтар. ХІа ччиччи пуная:

– Зун батІарди цІуппи гІур тІишанасе, хинкІар акъас.
Сасра ччиччи пуная:

– Зун хІуяг алиянасе, яккара гІахъуна, баб адестти
руьхъуьрай гебур.

БицІи ччиччи пуная:

– Зун каламарин салат акъасе.

Гьер ччиччи, фачучІуна, аркъая мебури чиппин курар.

Гьал гІурра тІишина хІязурди ая, яккара ая хІуягийъ
руьхъей. Салат хІязурди адава. БицІи ччиччи агъа:

– Каламар зун архуне, къутІарна укроп аме архас.

– Чин кумак акъасе вас гъагебур архас, – агъа хІа чияри.

Сайи къутІар архая, сасрайи – укроп. Хуппай савусал аркъая мебури мисаъ чиппи арху задар, гъазе хурара гІахъ-уне.

Гъал шибер эркъвая чиппин дарсар акъас. Са вахтту-нилас кардилас рукъа бабра, дадра. Бабас аргвая рушари акъуна курар.

– Агъ, зе кумакчибур, агъ зе джейранар, агъал хинкІара акъасе хъин, – агъа баба мебурис.

Рушар шад вея, баб рази ай агуф чиппил. Баба хинкІар аркъая, шибери усттулил задар алиянас кумак аркъая. Са дахи хІязур хъуне хинкІар.

– Шаб, шаб, гъала, усттулихъди, – агъа баба, – мисаъ хинкІар хІязурди ая.

Хулан хизанар джалда хъай эркъвая усттулихъ. Дада агъа:

– ЯгІа фи тегІди хъучархъуне ме хинкІар?

– Гъин, – агъа баба, – мишттин рушар хъаегуна фи верефе Іелеттар акъас зас.

– Чухсагъул, зе рушар, гъал зас аргвая чун фидегъен диреттар ичин, – агъа дада.

Шатти ая ме хулан хизанар, сад сайил рази ая.

Магъа гъаме э хулаъ ае баракатна нуьхІуьбат.





ХІабаб

Рукъижатахъна Саваржатахъ са Іуссе хІабаб хъая. ХІабабас иджи аргвай андава, иджи унихъайра андава, руцаефра хІабаб са яваш-яваштти э, учин кІашра аккирхІай. ХІабаб гъургъафра са яваштти э, джил гъавайи агъдархъай.

Учин хуттулар ппара кканди ая ме хІабабас, хуттуларис чиппин хІабабра кканди ая. Саваржатанна Рукъижатан кІиларилас учин рукъу гъилар алайхІая хІабаба.

– Я хІабаб, фикъас э вун гъалиштти хъуф? – пуна, хабар гъуршанде Рукъижата чиппин хІабабавас.

– Іуссе хъухІела, хІабабан, – агъа хІабаба, – зе джандихъ гъал хІял хъандава.

– Джигъил вахттуни ве чІарар фи рангунинттар и, я хІабаб? – агъай, хабар гъуршанде Саваржата.

– Гъале ве суман кІареттар и, хІабабан, – агъа хІабаба. – Гъал Іуссе хъугуна, зе чІарар джагвар ибхъ суманттар хъуная.

Рукъижатасна Саваржатас чиппин хІабаб язукъ вея, хІял киндавахІела. Ппара иджи ахъаджихІа рушар къарихъ.

Ке ппара кканве хуттуларис хІабаба чиппис авалдин вахттарихъас ахттилатар, хІикатар ахъаркъагуна. ХІа-

баба хІикат ахъаркъая – хуттулари хъеб лихъая, сивара ккерхъуна, гъафил хъуна.

– Чинра гъалиштти Іуссе хъасегъан, хІабаб? – пуна, хабар гъушая хуттулари къарифас.

– МехІелди ваъ, зе рушар, ваъ, – агъая хІабаба. – Вахттар ушуна, гагъар адегуна, хабдис чунра Іуссе хъасе, хІабабан. Зун те вахттунис илгвасттава. Чун захъ суман, чвахъас чве хуттулара ахъажихІасе.

Мишттира пуна, хІабаба Іудар хуттулар учин Іу ачІарикк кичикІа, пеІела учин чаркквар суман. Рукъижатасна Саваржатас унихъая фиштти чиппин хІабабан йиркІв лихайчин, фиштти чиппин хІабаба эл дивайчин. Ширинди-ширинди сакин вея рушар чиппин хІабабан ачІарикк.

– Шаб, шаб, Іуъшанттар акъас усттулихъди, – агъа баба са вахттунилас.

Фацуна гъилар, гъадивая хІабаб хуттулари диванилас, гъая чиппихъай усттулихъди. Ке идже Іелеттар удигъай чиппин хІабабан удигъди аркъая шибери.





ХІабиб

ХІабиб гьал хІа хьуная, ми гьер ягъа мактабиди
везе. Мактаб вархал э алеф мебурин хуларигъас.
Ме кІиркІ гьер багамикестти хьуруцай э вереф мактабиди.

– Машинаригъас мугъатти ухь, – агъа ХІабибас учин
дада, – рекъуьлас алттаверегуна, сифтта чиппил багухъди
хьуттурф, хуппай – хІуьрджал багухъди.

– Хьурай, дад, – агъа ХІабиба. – Зун мугъатти ахъасе.

ХІабиб вархал дуламиш везеф ичира, мактабиди са
ягъара къана акъуфттава. Учин дарсара са ухьтанди хурая
ме кІиркІа. Учин классинттарис хІуьлматра аркъа ми.
МеГелимара, дадар-бабара ппара рази э ХІабибал.

Са ягъа учин дарсар ккиркІухаб, рекъди учин хулади
вей хьуная ХІабиб. Ме рекъ машинаринф э, са къирагъ-
ихъас, эхІттиятди ушуна кканди ая мисаъас.

Садпуна, аргва ХІабибас: са бицІи шиниккв ахъихьуна
учин туппухъ аттархьуная дузди машинарин рекъун яІа-
нилди. Машинара аргва ая мис вархайиъас мич вей. Акъу-
на яхІ, тегІди ушуна, фацуна гьил ме шиниккв алттивая
ХІабиба машинарин рекъуьлас. Шиниккв гъарай аркъай
Іешая учин туппухъас, амма ХІабиба, цІуппи фацуна гьил,
фартай адава ме шиниккв рекъулди. Кичархьуна са маши-
нин фурукк шиникквдин тупп чурхъая, шиниккв хъара

Іайи Іешая. Гъаме вахттуни гъемич аттархъая ме шиникквдин баб. Бабас аргвая фи ичин мисаъ хъунаеф.

– Агъ, зурба, вун ягІа зе шиниккв ккеттивуне машинариккес, – агъая шиникквдин баба, – шаб зун вас фи хъунара ицІас.

– Ваъ, баркаллагъ, – агъа ХІабиба, – зас са фера ккандава.

Хулаъ учин дадас ахъаркъая ХІабиба шиникквдин ахттилат.

Дада агъа:

– Вун зе зурба э, вун зе игит э, ХІабиб. ХІа саваб гъушуная вун вас ягІа. Амма, зе кІиркІ, мишттин кар алчархъегуна, вун васра эхІттият аркъай акъе. Вас ягІав, засна ве бабас вун фидегъен кканди айчин?

ХІабиб суман къехІелар ппара хъурай хъе джилил, инсанарисра, учин ватанисра муфиІят хъас.





ХІуриъ

Дада гыкуная Рустамна Къадир гІулана хІада-
данна хІабабан багуъ хІуриди. Шад хьуная чу-
ппар: ппара гагъ и мебур шагьурдиъас найичра девей.
ХІуриъ гІулана ппара идже вей э. Чаб хІуриди веягуна,
Рустамана Къадира балугъар фацас удочкабура гьушуная,
дурухІас туппра, хурас китабара.

ГІулана сувар, чуллар, тукар ахьуна гьузуна аве, була-
харин хьеттар мертти, ругьуна, тегІди-тегІди, дурухІай,
алавей ая. Завариъ гьер джуьрайин нахширарин джилар
унихъая, гъазе чІираригІ чукІер, къваницяяр, зибзар
гІаруцая. Тукарил аларцвай цІабрухъанар лихъванди ая.
РухаригІ чІекІер гІая, ІуьраригІ къаркагІубар гІая. КІилди
джилар, завар джан але задари арцІая.

Ппара шад хьуная хІададна хІабаб, хуттулар адеф
шагьурдиъас. Рустамасна Къадирас гьал тегІди хІурихъ
хьуттурфанас вес кканди ая. Къабахъ ягъа ушуне мебур
хІурин куьчабуриъас ккируцай, гьвандин хуларихъ хьу-
ттурфанди. Мисаъ Рустамасна Къадирас алчархьуне ме
хІурин шиникквар. Таниш хьуне мебур чаб чиппихъай.

- Зас Ризван э агъаф, – агъа са гадаи.
- Зас Ринат агъафе, – агъа сасра гадаи.
- Зун Амир э, – агъа са гадаи сара.

Джаллабур хъай ушуне мебур тупп акъас. Гъал шагъурдин кІиркІарна хІуринттар дусттар хъуне. Сасра ягъа мебур хъай завал хъуна, ушуне нецІухъди. Рустамана Къадира чиппин удочкабура гъушуна уйи. ХІурин шиниккварихъ удочкабур хъадава, мебурис ягІай адавуйи удочкабирилди балугъар фацас. ХІуринттари муккурарилди э чІекІер фарцанф. Рустамана Къадира ягІар акъуне мебурис удочкайилди балугъар фацанас. Гъал Ризванра, Ринатра, Амирра удочккара фай фачучІуная, вей чуга аркъай чиппифас балугъар фацанас.

– МатІурша, унар маркъа, магъургъа, – агъа Рустама. – Дахъичин чІекІер гъишасе, гебурис ппара иджи унихъафе.

– Ул алдимихъа, гъа, – агъа Къадира, – хъеттихъ хъуттурф, бицІиди удочкка диваф суман ттуттугуна, вартт акъуна, гІаттив.

Фидегъен шад вей хІурин гадабур чиппифас балугъ гІадихъас хъегуна.

Сасра ягъа мебур джалла ушуне нецІухъди хІуъл акъас. Са паяри гъванар, чІилемпаяр гъая, сасбури цал аркъая, нецІв гъитІанас. МаслихІятилди, хъай батІарди лиханди ая шиникквар. Цал хІазур хъе вахттуни, яваш-яваштти фатуне мебури мич хъед. Вей-вей хъетти арцІая хІуъл. Сифтта хІуълиди вей хъед тІахІурфи, хабдис – бицІи-бицІи ккемилкъванди мертт хъуне.

Фидегъен бахилди ая шиникквар чиппин Іуърал. Чаб ая мебур кІилди ацІуна ругари, бетІурари, шавлара хъуная мебур, амма чаб чиппихъай шатти гъургъая.

– ЯгІа ме Іуъран кІенаъ яхурна¹, бетІур ая, – агъа Ризвана, – ягІа мисагІ гІучас хъасттава. Багагъ хаб адесе хъин гъемич.

¹ Яхур – дихъе бетІур.

– Айчин нецѣхъ хѣин мерттра акѣуна, ягѣа хулариди весе, – агѣа Рустама.

Сасра ягѣара идже куче рагъ ая. Шиникквар гѣал гѣучѣас вея чиппин хѣулихѣди. Гѣамебурихъ гѣузуф суман, са ухѣтанди мертти хѣедра ая мебурин ѣуѣраѣ. Завуѣ ае джагвар кѣирибур ѣегуракес суман аргвая ме ѣуѣран хѣеттикес.

– Гѣал гѣучѣ гадабур! – пуна, шатти гѣарай аркѣа Амира.

Кѣиркѣар, вегѣна цѣугѣ алихѣуна, гѣархѣая хѣуѣлигѣ.

Хѣурин шиникквари гагъ ѣуѣрахѣди, гагъ даради, гагъ сувариди гѣая чиппихѣай Рустамна Кѣадир. Лап цѣуѣппе дусттар хѣуная хѣурин шиниккварикесна шагѣурдинттарикес гѣал. Цѣаде ягѣари адаркая мебур, эмсе ягѣари, эѣуна хулаѣ, китабар хурая. Гѣамиштти гѣултра ккиркѣу-не. Гѣал Рустамна Кѣадир ушуна кканди ая хаб шагѣур-диди.

– Сасра гѣуланара шаб гѣа хѣуриди, – агѣая мебурис дусттари.





Будай

Зияратна Шамсият дурухІая хула-хулияр аркбай.
Шамсиятан хулаъ э меселети мебур аеф. Шамсията агъая:

– АцІуна игрушккабур хъая захъ, шаб, Зиярат, зун вас гъагебур агвар акъасе.

Са хІа ишигиъас чиппин хулан усагъди адархъа Шамсията учин игрушккабур. МисагІ ая гитан, курцІул, джагвар гІур, ире сул кІаре ибурара алеф, хІерфарна ишкилар кие кІутар, машин, сасра задара.

– Магъа, магъа, Зиярат, – агъая Шамсията, – фидегъен айчин мебур!

Ме игрушккабурин яІанигІас Зияратас аргвая са цІуре будай. Са гъилра киндава, берхІемра чІургъуная. Гъуршанде Зиярата ме будай.

– Гъеле будай лап цІуреф э, я Зиярат, – агъа Шамсията, – вун вас сара батІар игрушкка гІаттив мисагІас.

– Са фера акъасттава цІуреф ичира, – агъа Зиярата. – Зун ме будай Іуъчанасе, зун мис цІае берхІемра дикъасе, чІарара джирхасе. Зас кканеф гъаме будай э.

Мишттира пуна, Зиярата айчугуна, гъилра ккикІа будин, туфлибура джикІина аликІа лекарил.

– Айчин вас хъурай гъеле, – агъа Шамсията, – вас сасра щейъ дакканчи.

Файдина чиппин хулади, Зиярата батІарди Іуърччанде ме будай, рагІ гъушуна кІилра джирхая будин, мин кѣизилдин чІарарил ире багъра¹ гІиртІанде, Іуьбукул акъуна. Гьал батІар цІилкІамарикес будис гьер джубрайин берхІе-мара дикъуне Зиярата.

Сасрагелай, Шамсият адегуна Зияратан хулади, мис учин будай ягІар хъундава.

– Фидегъен батІар будай хъая вахъ, Зиярат, – агъа Шамсията.

Зияратас элхъ ккерхъуне. Ми Шамсиятас агъа:

– Я, Шамсият, гъале вун зас йи будай э. Зун гъале цІае акъунаеф э.

Зиярата аттивай, – агвар аркъая Шамсиятас учи будис дикъуна аедегъен кунар. Мисаъ ая ире берхІем, джагвар кѣирра хъихъуна гъиларихъ, гъазе берхІем пирпираяра² ккей кІенакк, харчІе батІар берхІем. Ппара идже усттайи суман дикъуная Зиярата ме будис кунар.

– Фиштти акъуне вун гъеле кунар? – пуна, хабар гъуршанде Шамсията.

– ГІашкъунис, Шамсият, гІашкъунис, – агъа Зиярата.



¹ Багъ – чІараригІ гІикІа лента, бантик.

² Пирпираяр – берхІемин кенакк, гъиливаригъ, хулар акъуна гъиртІан багв кьумашин, кѣирарин (оборки).



Хъид

Шавла хъуна Ёурдин мекІериккна джикаларикк инсанар ахъутІуная хъидихъ. Амма хъид теГІди адава адес. Яваш-яваштти, алихъай учин лекар рекъерил, вея хъид. Хъиди лек алихъу мукъуйил джагвар ибхъер уьцІай, хъед хъуна, джилари дивая. Хъиди кетІас аркъая Ёурдин ахуникес джилар, кІурар, нахширар.

Хъидин рагъ вея ибГІайи, учин нулар фартай ери багухъди. Рагъ киркъуф, джиларил але ибхъер, хъуна хъеттин рухар, алавея хІуьлакди нецІварихъди. НецІул але мерккв чурхъуна къурцар хъуна, вея хъеттин варттал алди. Хъеттин ун ккетІуная джиларикк. Ибхъер уьцІу мукъарил гъазе чІирин кІилар аргвая, хІезурди ай агъучІас.

Хъид адеф, нахширари, шад хъуна, мегІнибур аркъая, аларуцай чулле заварил. ВяхІши хІейванара ппара бизар хъуная Ёурдикк, чаб гашилана микІила аяхІяла ме вахттуни. Цулана магъариъ учІуна гъархъу багниш, гъал ибхъ уьцІай хъеттин тІинкІари кетІас аркъая. Ибхъин хъед, Ёур хъуна, гъузуная багнишин магъариъ.

Инсанара ппара шад хъуная хъид адехІела. Ёурдин къикъе кунар алдахъуна, гъал илгунттар аликІая инсанари. Салариъ ае мал-къарара шад хъуная, хъид адеф хабар хъуф. Салариъас рухая гебур, гъазе чІирилди вес кканди.

Хъидана, джалла нахширарихъ бицІи чаркквар вея.



Ѓурд

Ѓурдин вахттра шиниккварис ппара кканве, мекЃил
Ягъар вейчира. Ѓурдана шиникквари цухалаяр
аркъа, алекъуна мурхЃарил, ибхьин туппар аркъай дурухЃая,
ибхьин хЃа пусар аркъа. Ппара шадвел гъая Ѓурди шиник-
кварис.

Ѓурдихъра учин ухъттанвелар хъая. Джагварди-джаг-
варди ая чулар, сувар, дарар. Мебурил Ѓурди учин джаг-
вар ккулин муртт алчихъуная. Къалин ибхьи джилар ухЃая
Ѓурдин аязыккес. Ибхьин кЃенакк ккие, агъучЃас хЃязурде
бицЃи чЃирарис, къацЃра аяз керхъай адава, гебурис мекЃ
вей адава. НецЃварил меркквар алди айчира, мерккун
кЃенаккес мертте хъед учин хулди адавей аме.

ЦЃаде ягъари рагъу хуппурил, гЃарарил але ибхьерив,
музе хЃянгарис суман, гьер джурайн нурар ицЃас аркъая. Ме
вахттуни уларивас ибхьихъ ппара хъуттурфанас вейдава,
Ѓур аркъай. Амма ппара батЃарди ая ибхьер!

Джикали фачахъу ибхьер Ѓайи аяз хъегуна, са цЃуппи
хъуная Ѓурджуф суман къукъкъуна гъузая. Ме ибхьикес
гъал ккехун хъуная. Инсан мишттин ккехунилас ушучира,
лекар ахтт архъайдава, илгунди, са ряхЃатти алттвея. Ѓайи
аяз хъегуна, рекъери ае ибхьери инсандин лекариккес
хур-хурс атая.

Суван хІурариъ Іурд цІуппеф ве, мекІилф. Мисаъ четин э инсанарисра, маларисра, нахширарисра, вехІши хІейванарисра Іурд алдихъас.

ВяхІши хІейванарин Іурдис къалин чІичІ агъучІая, ме чІичІи мебурис мекІ хъас артайдава. Іурдана нахширари инсандин хулахъди багу хъас яхІ аркъая, чиппис фи ичира ІуътІаф фуркъайчугас.

Нахширарис шиникквари аркъая бицІи латар, жубар¹. Мисаъ мебури архъая джакъварис къур, гуниварин къур-цар. Ме кардил джакъвара шад вея, шиникквара.

Шагъурари аеттарис Іурдикес ппара хабар вейдава. Угъучира, мисаъ ае ибхъ дахи-дахи уыцІуна, хъед хъуна вея. Шагъурари ае инсанар ппара байирдиди аттвейдава.



¹ Жубар – урклар.



Рагъухъан

Хьидин май агъа ваз гъазе чІираринф э, батІар тукаринф э, арсуран угъаларинф э. Хьидана угъал гагъ музи-музи угъа, гагъ къалинди угъа, хІуъл алихъуф суман, гагъ арсуран цІарар хъуна, завукес ахтт кедаргъа.

Майдин вазала са-сагелай завар рухая, цІайлапанар аргвая заварил. Ме вахттуни заварил але къирибурин вея дегІви, цІа йирхІай цІайлапанар аргвая заварин тисаъас, мисаъас. ЦІайлапандин цІа кие цІарари гъава завар чурхъуна, пат-пат аркъаф суман ве.

Са вахттунилас джилилди завуъас керхъая са-Іу мерккун уд. Вей-вей къате вея мерккв. Гъал джилар джагвар хъуне. УркІар ае мукъариъ, мерккв уьцІай, хъеттин Іуърар вея. КІунтІарил але меркквар уьцІай, хъуна хъеттин хІуълар алавая. Хъеттин хІуълар сад сайигІ гІадухъуна, ппара хъуна, рухар вея. Рухар, шиникквар суман, дурухІай, нецІвариди гъуккай-гъуккай яхІ аркъая. НецІвариди рукъу хъед ярамиш¹ вея нецІун къираригІас гич, ахтт кІил акъуна, хІулихъди вес.

Угъуна ккиркІухаб, айчІуне заварилди къизил рагъ. Гъал адине рагъун девир, къирибур, къил-къил хъуна, гъишине суварихъди. Рагъ элхъюне, учин къизилдин нулар йирхІуне джиларис.

¹ Ярамиш хъас – аларцвас, ккевес.



Гъаме вахттуни айчІуне ери рангуни рагъухъан, алдихъуна мугІ, ухътан акъуне дуънья. Рагъухъандин рангарил бахил хъуна, нахширари агъушуна заварилди фачучІуне акъас чиппин мегІнибур. Рагъухъан агуттарин цІиял вея гъил кирхІас ме ухътан рангарик, кканве ме батІар мугІуйилас алттвес. Амма фидегъен алучІучира, рагъухъан фацанас хъасттава. Рагъухъан суьхІуьрдин мугІ хъуна, гъурзанде, джилар-завар фацуна, муьхІтал акъуна учил инсанар.

ЯгІа рагъна рагъухъан Іуд Іу чи суман ая, заварилди хъай аттиная. Ме хъидин ягъ ппара ухътан хъуне гъал. КІилди джилар, чІирар, тукар гъал шад хъуне. Джиларилас, куче хуна, эл алагъвея, тукари чиппин цІабар дархъая, дара учин бицІи цІабар фартая. Ширин батІар ниъар вея цІае чІирарихъас. Хъеттарин ІуьраригІас гъазе гІубар рахвая.

Джан аледегъен шейъер шатти ая рагъна рагъухъан аргвай.



Якьу чи

Сифтта адиная са чи. Файдиная учихъай рагъ. НецІварил але меркквар уьцІуная, джиларил але ибхъер, ккехунар уьцІуная. Рагъун нулар фартай, ибгъа акъуная джилар. Гъазе чІирар, хъюхъе тукар тІушуная агъучІас. Гъава заварил аларцвая нахширар, алихъуна цІивна уьштт. Хулан маларисра, вяхІши хІейванарисра бицІи чаркквар хъуная. Инсанар езанар акъас фачучІуная ме вахттуни, тумар ичас хуппурис. Хуттурфуна гъер са мукъуйихъ, рази хъуна учил, ме чи тІушуная вес хаб.

Гъал мич адине сасра чи. Тукарин хабар фартая джиларилди, цІабрухъанарин къушумар фартая тукарилди. Дарарихъ гъазе цІабар ахъас аркъая. Куче, цІаде ягъар гъая учихъай. Шиникквар адархъая хуларихъас. Са пай нецІварихъди вея гІучІас, сасра пай – дарариди вея адаркас, хъара сасрабур сувариди агъавея, батІар суварис улар йирхІас.

Ачухъди ая кІилди дуьнья.

Суварихъ хІуппарин кІаратІар ая. ГІарарихъ ІуькІер уцай инсанар ая. Хуппурихъ хъучархъай мяхІсулар ая. Шатти, разиди ая ме чира, амма гъал ппара гагъ хъуне мин мисаъ, ме хаб ушуна кканди ая гъал.

Мегелай хъибудпе чи адине. Инсанари мяхІсулар алчагъая чиппин хуларилди. ЧІирар, хъюхъе хъуна, чІи-

гея²⁵, даран цІабар са-сатти алархъая. Музе угъалар угъая, ругъу тиребар рахвая, алихуна уыштт. Ягъар джикъе вея, Іуышар ирхе вея. Заварил нахширарин хулар аргвая ибгІа мукъарихъди вей. Іар вея сувар, чуллар. Ме чира рази хъуна, ушуне.

Адине якъудпе чи. Ме ччиччи фадахъуне заваритъас джагвар ибхъин цІепелар, ругъас акъуне джилар, нецІварил алийине меркквар. Гъал адине мекІер, джикалар. ТегІди-тегІди аязра файдине ме ччиччи учихъай.

ВяхІши хІейванар джин хъуне чиппин мугариъ. Инсанар учІуни чиппин хулариъ. Гъал четин вахтт адине гъар са джан але заттис.

Гъемиштти айчира, шиникквар шатти ая. Алекуна мурхІарил чиппис цухалаяр аркъая мебури. «Ппара угъурай ибхъ, – агъая инсанари, – ппара мяхІсулар хъас хуппуриъ».

Гъал ме чира хІуылак хъуне хаб вес.

Якъудара чияр кканве инсанарис, мебур якъудара лазимттар идехІела.





Содержание

Гасанова Салминат	КъутГурар51
Нурадиновна. Дорогой	Джакъварихъас53
читатель!..... 2	Камилайин мудурар55
ХІуппахъандин тулла..... 4	КъарнатІай56
Удач-гитан..... 7	Зе баб.....58
Къари-хІабаб.....11	Зе мегІелим59
Ире-цІантукар.....13	Кумакчи60
Зе дадан чІал.....16	Ккабашккаларис.....62
Назперин дад18	Гуни65
ХІуппахъанна хІуч.....23	Авалдин дурухІалар68
Цулин вахтт27	Іу къунши.....70
Ватан29	Сифтта ибхъ.....72
Суваріъ31	Гитан74
Че цІегъер35	Чияр76
Турист.....37	ХІабаб.....78
Савда39	ХІабиб80
ФатІимат41	ХІуриъ82
Сулна гІур43	Будай85
Са классинттар45	Хъид.....87
Цул.....47	Іурд88
Цулин дар49	Рагъухъан.....90
	Якъу чи92

ББК
УДК
Р–

Рахманова Г.

Р– Рагъухъан: Ахттилатар. – Махачкала: ГАУ РД
«Дагестанское книжное издательство», 2023. – 96 с.

Рахманова Г. Радуга: Рассказы.

Ахттилатар учин ватанихъас, агъуларин чІалахъас, хи-
занарин маслихІятихъас, дузвелдихъасна дусттвелдихъас.

ББК
УДК

Р $\frac{470??? - 34}{М 123 - 2023}$ 62 – 2023

ISBN 978-5-297-02362-8

© Рахманова Г., 2023
© Дагестанское
книжное
издательство, 2023

*Рахманова Гури
Рамазановна*

РАДУГА

Рассказы

На агульском языке

Редактор *С.Н. Гасанова*

Художник *Р.А. Темирова*

Художественный редактор *М.В. Левченко*

Технический редактор *В.П. Гаджиева*

Лицензия ИД 05334 от 10.07.01

Подписано в печать 15.05.2023

Формат 70х100¹/₁₆. Бумага мелованная

Гарнитура «Georgia». Печать офсетная

Уч.-изд. л. Усл. печ. л. 7,7

Тираж 300 экз. Заказ № 576

Цена свободная

ГАУ РД «Дагестанское книжное издательство»

Агентства информации и печати РД

367000, г. Махачкала, ул. Пушкина, 6

Отпечатано в ООО «Дагпресс-Медиа»

367002, РД, г. Махачкала, ул. Даниялова, 48